

DIDZA' DXI'A BUZÚAJĚ' MARCOS

Libán beně' Juan, bönni' buquilě' bönachi nisa

(Mt. 3:1-12; Lc. 3:1-9, 15-17; Jn.1 :19-28)

1 ¹ Caní gusí lo didza' dxi'a ca guca queě' Jesucristo, Zxí'ině' Dios.
² Budxín lě na' buzúajě' lu guichi Isaías, bönni' bē'ě didza' uláz queě' Dios, le gunné' Dios:

Buyútsöca', risól-la'a bönni' gubáz quia', inóruě' Lo'.

Lě' upé'ě nōza ga tōdu'.

³ Yōn chi'ě tu bönni' ulidzě' zidzaj lu lataj cá'asō, inně':

“Buli'pá'a nōza para idxín Xanru' yichaj lázxdo'oli'.

Buli'béaj li yugu' nōza lasi ga tōdē'.”

⁴ Caní budxín, tu' ruquilě' Juan bönachi nisa lu lataj cá'asō, en runě' libán para ila'dila bönachi nisa, bönni' na' bulu'bí'i lādxi'gaquiě' para uniti lahuě' Dios dul-la' nabága'gaquiě'. ⁵ Bila'rúaj bönachi zían yúgu'tě yōdzō luyú Judea, enca' yōdzō Jerusalén, en yōjáquiě' ga na' zoě' Juan, ate' Juan na' buquilě' légaquiě' nisa lu yegu Jordán, bönni' na' gula'xóalēpě' dul-la' nabága'gaquiě'.

⁶ Nácuě' Juan lari' néquini lítsa'ba' böa', en núguě'ě lě'ě tu guídi. Rahuě'-ba' bóchi'zu, en rel'jě' le zxixi que buzdo'. ⁷ Runě' Juan libán, rnně':

—Si' zě'ě bönni' tōdi na'a, náparě' yōl-la' unná bē' ca neda'. Biti' naca' neda' lesaca' yéchua', para ilecja' xiráchuě' nudé'ě. ⁸ Neda' ruquila' libí'ili' nisa, pero Lě' guně' le ruluí'isō yōl-la' ridila nisa ni, uchíziě' libí'ili' Dios Bö' Lá'ayi.

Ridilě' Jesús nisa

(Mt. 3:13-17; Lc. 3:21-22)

⁹ Tu dza ni' birúajě' Jesús yōdzō Nazaret luyú Galilea, ate' Juan na' buquilě' Lě' nisa lu yegu Jordán. ¹⁰ Cate' burúajě' Jesús lu nisa, la' ná'asō bilé'eně' gualaj lúzxiba, en ruhuōtjě' Dios Bö' Lá'ayi, ruluí'i cuině' ca tuba' gu'dōdo', en bidisóaleně' Lě'. ¹¹ Biyōn chi'i nu ruí'i didza' yehua' yubá, rnna:

—Li' nacu' Zxí'ina'. Nadxí'ida' Li', en raza lādxa'a Li'.

Rě'ěni tu' xihui' gun ga ibáguě'ě Jesús dul-la'

(Mt. 4:1-11; Lc. 4:1-13)

¹² Ní'irō Dios Bö' Lá'ayi guché'ě Jesús bayudxi lu lataj cá'asō.

¹³ Guzōě' Jesús lataj cá'asō na' idú choá' dza, ate' gú'uni Satanás tu' xihui' gun ga ibáguě'ě Jesús dul-la'. Guzōě' Jesús ga ni' ta'daba' böa'

guixi' dzó'öba' guí'ado'. Yugu' gubáz lá'ayi queë' Dios gulácalenë' Jesús, en gula'gu'ë le gudahuë'.

Rusédinë' Jesús bönachi luyú Galilea

(Mt. 4:12-17; Lc. 4:14-15)

¹⁴ Gudödi gula'gu'ë Juan na' lidxi guíë, sa'yéajë' Jesús luyú Galilea. Runë' libán ni' que didza' dxi'a ca rinná bë'ë Dios. ¹⁵ Caní rnnë':

—Chibidxín dza. Chizóa idinná bë'ë Dios. Buli'bí'i ládxi'li', en guli'tséajlë' didza' dxi'a ni.

Rulidzë' Jesús tapë' bönni' uzxón böla

(Mt. 4:18-22; Lc. 5:1-11)

¹⁶ Tsanni ni' ridé' Jesús ra' nísado' luyú Galilea, bilé'enë' Simón len Andrés, bönni' böchë'ë Simón na'. Nácagaquië' uzxón böla, en ta'chiljë' yöxaj böla quégaquië' lu nisa na'. ¹⁷ Jesús gudxë' légaquië', rnnë':

—Guli'dutá' neda', ate' guna' ga iché'ëli' bönachi quia' neda', gunli' ca runli' rizönli'-ba' böla.

¹⁸ La' bulu'cá'anatë' yöxaj quégaquië', en sōjácálenë' Jesús.

¹⁹ Gudödë' Jesús ia'láti'do' ní'ilö, ate' bilé'enë' Jacobo, en Juan, yugu' xzí'inë' Zebedeo, nacu'ë lë'e bárcodo' quégaquië', tu'únë' yöxaj böla quégaquië'. ²⁰ Jesús la' bulidztë' légaquië', ate' bulu'cá'anë' xúzgáquië' Zebedeo, dzáguie' yugu' huen dxin queë' lë'e bárcodo' na', ate' sōjácálenë' Jesús.

Tu bönni' yu'u lë' bö' xihui'

(Lc. 4:31-37)

²¹ Bila'dxinë' Jesús, en yugu' bönni' dá'gaquië' Lë' lu yödzö Capernaum. Cate' ni' naca dza lá'ayi quégaquië' bönni' judío, guyázië' Jesús yu'u ga tu'dubë' bönni' judío, en tu'sëdë' queë' Dios, ate' gusí lahuë' rusédinë' nupa nudúbigaca ni'. ²² Bulu'bánninë' ca na' rusédinë' Jesús, tu' rusédinë' ca runë' tu bönni' dë lu në'ë, en calëga ca tunë' bönni' yudo' usëdi. ²³ Zóatë' ca' tu bönni' yu'u lë' bö' xihui' lu yu'u ga na' tu'dubë' tu'sëdë' queë' Dios, ate' guródxí'ë bönni' na', rnnë':

²⁴ —¿Bizxi rál-la'tu' quiu', Jesús, bönni' Nazaret? ¿Za'tsu' usunítu' netu'? Núnbë'a Li', nacu' Bönni' Lá'ayi queë' Dios.

²⁵ Jesús buzenë' le bach, rnnë':

—Busayaj ru'u, en burúaj lu bönni' ni.

²⁶ Ní'irö bö' xihui' na' buxízida' bönni' na' yu'u lë', ate' guródxí'a zidzaj, en la' burúajtë. ²⁷ Bulu'bánninë' yúgu'të bönni' nacu'ë ni', ate' gula'nabi luzé'egaquië', ta'nnë':

—¿Bizxi caz lë ni? ¿Naru' nácatsö xibá cubi? ¡Len yöl-la' unná bë' rinná bé'enë' yugu' bö' xihui', ate' tun ca rnnë'!

²⁸ La' guzètè didza' que yöl-la' huáca queë' Jesús, ate' bila'yöni bönachi idútè luyú Galilea na'.

Ruúnë' Jesús xiná'anú nigula queë' Pedro

(Mt. 8:14-15; Lc. 4:38-39)

²⁹ Ní'irö burúajë' Jesús lu yu'u ga na' tu'dubë' tu'sëdë' queë' Dios, en la' guyéajlentë' Jacobo, en Juan, ate' bila'dxinë' lídxigaquië' Simón, en Andrés. ³⁰ Ni' dënu xiná'anú nigula queë' Pedro, yú'unu tu xilá. La' gula'guíxjöi'itenë' Jesús ca raca queënu. ³¹ Ní'irö gubígui'ë Jesús, ate' gudélë'ë ná'anú, en guchisë'-nu. La' burúajtë tu xilá na' yú'unu, ate' bupá'anú le gulahuë'.

Ruúnë' Jesús zían nupa te'e

(Mt. 8:16-17; Lc. 4:40-41)

³² Cate' chiridzó', ca gudxía gubidza, la' dujuá'gacatë' yúgu'të nupa te'e, en yugu' bönni' yu'u légaquië' bö' xihui' ga zoë' Jesús. ³³ Yúgu'të bönachi lu yödzo bila'guirö ga nu riyaza yu'u ga na' zoë' Jesús. ³⁴ Jesús bunë' zían nupa te'e, naca zían yödzöhuë' té'enë'. Bubéajë' ca' zían bö' xihui' yú'ugaca bönachi na'. Biti' bë'ë lataj ila'nnë bö' xihui' na' tu' núnbë'gaca Lë' Nu náquië'.

Runë' libán Jesús luyú Galilea

(Lc. 4:42-44)

³⁵ Zí'acado' guyasë' Jesús, ni' naca chul-la. Burúajë' yödzo na', en sa'yéajë' tu lataj cá'asö, ate' ni' bulidzë' Dios. ³⁶ Simón, en nupa nacuá'len lë' söjdíljagaquië' Jesús. ³⁷ Cate' yöjxáca'gaquië' Lë', të' Lë': —Yúgu'të bönachi tu'guílaj Li'.

³⁸ Ní'irö Jesús gudxë' légaquië', rnnë':

—Uyéajru' yugu' dzaga yödzo, para guna' ca' libán ni'. Que lë' ni na' birúaja'.

³⁹ Caní guca, gudödë' Jesús idú luyú Galilea, runë' libán lu yu'u gapa tu'dubë' bönni' judío, tu'sëdinë' queë' Dios, ate' rubéajë' bö' xihui' yú'ugaca bönachi.

Tu bönni' ré'enë' huë' nudzu' ruzödi

(Mt. 8:1-4; Lc. 5:12-16)

⁴⁰ Tu bönni' ré'enë' huë' nudzu' ruzödi bidxinë' ga zoë' Jesús. Buzóa zxibë', en gúta'yuë' lahuë', rnnë':

—Channö ré'ënu', huáca unu' neda'.

⁴¹ Jesús buéchi' ládxë'ë lë'. Bulí në'ë, gudanë' lë', en gudxë' lë':

—Ré'ënda'. Chinuhuöácu'.

⁴² Ca gunné' ca', la' bunítitë huë' ré'enë', en böáquië' dxí'ado'. ⁴³ Ní'irö Jesús buzenë' bach bönni' na', en la' busól-la'të' lë'. ⁴⁴ Caní gudxë' lë':

—Cuntu nu guío' ca bena' quiu', pero guyéaj, yöjluí'i cuinu' lahuë' bixúz, en yöjnödzej para le böácanu' li' que yudo' ca na' gunná bē'ē Moisés, lē na' uluí'i bönachi chinuhuóacu'.

⁴⁵ Burúajē' bönni' ni, en gusí lahuë' riguíxjöi'inē' bönachi zían ca guca queē'. Tu' buzē' didza' ni, bíti'rö guca tsáziē' Jesús yálajdo' tu lu yödzö, pero guzóasē' ní'ilö gapa naca lu lataj cá'asö. Bönachi yúgu'tē yödzö bila'dxín ga na' zoē' Jesús.

Bönni' ré'enē' huē' nacú'uniē' bin

(Mt. 9:1-8; Lc. 5:17-26)

2 ¹ Cate' chigudödi chopa tsonna dza, buáziē' Jesús yödzö Capernaum, ate' guzé didza' zoē' yu'u. ² La' bulu'dúbitē bönachi zían ga na' zoē' Jesús, ga bidxintē bíti'rö guzxéqui' ila'cuá' ni', ni ra' yu'u, ate' Jesús benē' libán que xtídzē'ē lógaquiē'. ³ Ní'irö bila'dxinē' ga na' zoē' Jesús tapē' bönni', nuá'agaquiē' tu bönni' huē' nacú'uniē' bin. ⁴ Biti' guca ila'dxinē' lahuë' Jesús tu' nacuá' bönachi zían ni'. Que lē ni na' gula'saljē' ícjo'olö ca dódilö ga zoē' Jesús. Cate' budxi bulu'dxiē' yeru na', ni' bulu'zötjē' le denē' bönni' huē' na'. ⁵ Cate' gúquibe'enē' Jesús ca na' ta'yéajlē'ē Lē', gudxē' bönni' huē' na':

—Zxi'ina', chibunít lahua' li' ca naca dul-la' nabágu'u.

⁶ Ró'ögaquiē' bal-lē' bönni' yudo' usedi ni'. Ta'zá' ládxi'gaquiē', ta'nné': ⁷ ¿Bizx que ru'ē caní didza' bönni' ni? Rucá'anē' cá'asö Dios. Cuntu nu bönni' gaca uniti lahuë' dul-la'. Tuzē' Dios gaca gunē' lē ni.

⁸ La' gúquibe'etenē' Jesús le ta'zá' ládxi'gaquiē', ate' gudxē' légaquiē':

—¿Bizx que rizá' ládxi'li' caní? ⁹ Biti' naca böniga nu guiésö bönni' huē' ni chibuníti lo dul-la' nabáguē'ē, pero naca böniga nu gun ga huóasē', en u'ē le denē', en uzē'e ni'ē. ¹⁰ Guna' le gaca bē' neda', Bönni' Guljē' Bönachi, dē lu na'a luyú ni uniti lahua' dul-la' nabága'gaca bönachi.

Ní'irö Jesús gudxē' bönni' huē' na':

¹¹ —Li' rea': Guyasa. Buá' le denu', en böaj lidxu'.

¹² La' guyásatē' bönni' huē' na', bu'ē le gúti'nē', en burúajē' lógaca yúgu'tē nupa nacuá' ni'. Bulu'bánninē' yúgu'tē', en gula'gu'ē Dios yöl-la' ba, ta'nné':

—Catu caz rilé'etu' le caní.

Jesús rulidzē' Leví

(Mt. 9:9-13; Lc. 5:27-32)

¹³ Burúajē' Jesús yödzö Capernaum, na' gudödē' leyúbölö ra' nísado'. Bulu'dubi bönachi zían ga zoē' Jesús, ate' Lē' busédinē' légaquiē'.

¹⁴ Cate' ridödē' Jesús ni', bilé'enē' Leví, zxí'inē' Alfeo, rö'ē ga ruquíxjē' uláz que yödzö zi'tu'. Jesús gudxē' lē':

—Gudá' neda'.

La' guyásatè' Leví na', sa'yéajlenè' Jesús.

¹⁵ Gudödi guca læ ni, rö'è Jesús rahuè' lu yu'u lidxè' Leví na', ate' zían bönni' uquízxaj, en ia'bal-lè' bönni' cá'asö ró'ölengaquiè' tsözxón Jesús, en yugu' bönni' usèda queè'. Caní guca, tu' rōjaca bōnachi zían len Jesús. ¹⁶ Cate' yugu' bönni' yudo' usedi, en yugu' bönni' yudo' fariseo, bila'lé'enè' Lè' rö'è rágulenè' tsözxón yugu' bönni' uquízxaj, en ia'bal-lè' bönni' cá'asö, gulé' yugu' bönni' usèda queè' Jesús, ta'nné':

—¿Bizxi caz runtsè'? iRè'aj rágulentsè' yugu' bönni' uquízxaj, en ia'bal-lè' bönni' dul-la'!

¹⁷ Biyönnè' Jesús didza' ni tu'è, en gudxè' légaquiè':

—Nupa nacuá' dxi'a bitì' naquíniguequi nu un bōnachi, pero nupa te'e naquíniguequi nu un bōnachi. Za'a neda', calēga dulídzagaca' bōnachi tsahui', pero rulídzagaca' bōnachi dul-la' para ulu'bí'i lādxi'gaca.

Ru'è Jesús didza' que yöl-la' run gubasa

(Mt. 9:14-17; Lc. 5:33-39)

¹⁸ Tu dza ni' tunè' gubasa bönni' dá'gaquiè' Juan, en bönni' dá'gaquiè' yugu' bönni' yudo' fariseo, ate' bila'dxín nupa gula'nabi Jesús, ta'nná:

—¿Bizx que tunè' gubasa bönni' dá'gaquiè' Juan, en bönni' dá'gaquiè' yugu' bönni' yudo' fariseo, pero bönni' dá'gaquiè' Li' bitì' tunè' gubasa?

¹⁹ Bubi'è didza' Jesús, rè' légaquiè':

—¿Naru' réquitseli' ilún gubasa nupa nacuá' laní queè' bönni' rutsaga nē'è tsanni ni' bönni' na' rutsaga nē'è zóalenè' légaquiè'? Tsanni ni' bönni' na' rutsaga nē'è zóalenè' légaquiè', bitì' gaca ilunè' gubasa.

²⁰ Idxín dza cate' udúè' bönni' na' rutsaga nē'è, en bíti'rō sóalenè' légaquiè', ate' dza ní'irō ilunè' gubasa.

²¹ 'Cuntu nu bönni' udé'è tu lari' cúbido' lu lari' chinatēbi, tu' utsupì' lari' cubi na', en huachōza' lari' tēbi na', ate' huaróza'rō lari' tēbi na'.

²² Lēscá' caní cuntu nu bönni' quē'è xisi uva cubi lu buzudi bidxi néquini guídi, tu' gal-la xisi uva cubi na', en ulá'a buzudi bidxi na' néquini guídi, ate' ilalaj xisi uva na', en gaca ditaj buzudi néquini guídi. Xisi uva cubi lu buzudi néquini guídi cubi ral-la' cá'aru'.

Bönni' dá'gaquiè' Jesús ta'lecjè' do dza lá'ayi

(Mt. 12:1-8; Lc. 6:1-5)

²³ Tu dza lá'ayi quégaquiè' bönni' judío, gudödè' Jesús gapa dē yōla zxoá' xtila, ate' bönni' usèda queè' gula'sí lógaquiè' ta'lecjè' do ga dxía zxoá' xtila. ²⁴ Ní'irō bönni' yudo' fariseo gulé' Jesús, ta'nné':

—Buyútsöca'. ¿Bizx que tunè' bönni' dá'gaquiè' Li' le cabí ral-la' gunru' dza lá'ayi?

²⁵ Jesús gudxë' légaquië':

—¿Naru' cabí nulábanili' ca benë' David cate' gudunë'? Biyadzaj le ilahuë' lë', en nupa nacuá'len lë' ²⁶ ate' guyázië' lu yu'u queë' Dios cate' ni' náquië' bixúz lo Abiatar, en gudahuë' yöta xtila tu'cu'ë lahuë' Dios, lë na' biti' dë lataj nu gagu, pero tuz bixúz dë lataj ilahuë' le. Bë'ë ca' le ilahuë' bönni' nacuá'lenë' lë'.

²⁷ Ní'irö Jesús gudxë' légaquië':

—Dios benë' dza lá'ayi le ulu'zì' xibé bönachi, calëga benë' bönachi para ilún chi'i dza lá'ayi. ²⁸ Que lë ni na', neda', Bönni' Guljë' Bönachi, naca' Xani dza lá'ayi.

Ruúnë' Jesús tu bönni' narequi' në'ë

(Mt. 12:9-14; Lc. 6:6-11)

3 ¹ Leyúbölö guyu'ë Jesús tu lu yu'u ga tu'dubë' tu'sëdë' bönni' judío queë' Dios, ate' zoë' ca' ni' tu bönni' narequi' në'ë. ² Bönni' yudo' nacu'ë ni' tu'yüë' Jesús channö ünë' bönni' na' dza lá'ayi, tu' té'ënnë' ulu'zégui'ë Lë' didza'. ³ Ní'irö Jesús gudxë' bönni' na' narequi' në'ë, rnnë':

—Guyasa, en guzuí lógaca bönachi ni.

⁴ Jesús gunábinë' bönachi ni', rnnë':

—¿Naru' dë lataj gunru' le naca dxi'a cate' naca dza lá'ayi o gunru' le ruá' dö'? ¿Naru' dë lataj gunru' ga ila'deli' bönachi yöl-la' na'bán o usunítiru' le?

Gula'cuá' dxisö bönachi ni'. ⁵ Ní'irö len yöl-la' rilé queë', buyüë' Jesús bönachi na' nacuá' gásibi'ilë'. Ruhuí'innë' tu' nácagaquië' zidi ladxi'. Gudxë' bönni' na' narequi' në'ë, rnnë':

—Bulí no'o.

Ní'irö bulí në'ë bönni' na', ate' böácatë dxí'ado' në'ë. ⁶ Ní'irö bulu'rúajë' bönni' yudo' fariseo, ate' la' guluntë' tsözxón didza' len bönni' dá'gaquië' Herodes bi ilunë' queë' Jesús, para ilútië' Lë'.

Tu'dubi bönachi zián ra' nísado'

⁷ Buzé'ë Jesús ni' tsözxón len bönni' dá'gaquië' Lë', en bidxinë' ra' nísado', ate' sōjácálen Lë' bönachi zián narúajgaca luyú Galilea, en luyú Judea. ⁸ Bönachi zián narúajgaca Jerusalén, en luyú Idumea, en ia'tsölá'a yegu Jordán, en yugu' yödzö nacuá' idú gásibi'ilö ga nacuá' yödzö Tiro, en yödzö Sidón bila'dxín ca' ga zoë' Jesús. Caní gulunë', tu' bila'yönnë' ca nácagaca yugu' le zxön runë' Jesús. ⁹ Que lë ni na' Jesús gunná bé'enë' bönni' dá'gaquië' Lë' ulu'cóztica'së' tu bárcodo' ga gaca cuenë', para cabí ulu'quí bönachi zián na' Lë'. ¹⁰ Caní guca tu' chibunë' zián nupa te'e, ate' bila'guirö bönachi zián na' ga zoë' para ila'gán Lë'. ¹¹ Cate' bö' xihui' yú'ugaca bönachi bila'lé'e Jesús, bulu'dxiga' bönachi na' yú'ugaca xini'ë Jesús, ate' gula'bódxia', ta'nná:

—Nacu' Li' Zxí'inë' Dios.

¹² Jesús buzenë' le bach bö' xihui' na', cabí ila'guixjö' nu náquië' Lë'.

Riböë' Jesús chinnu bönni' ilácagaquië' gubáz queë'

(Mt. 10:1-4; Lc. 6:12-16)

¹³ Ní'irö gurenë' Jesús tu lu guí'ado', ga ni' bulidzë' nupa ré'tënë'. Gula'biguë'ë bönni' ni gásibi'ilë'. ¹⁴ Jesús bucu'ë chínnuë' bönni' ni, para ila'cuá'lenë' Lë', en para isól-lë'ë légaquië' tsöjéngaquië' libán.

¹⁵ Budödë' lu ná'agaquië' yöl-la' huáca ulu'únë' nupa te'e, en ulu'béajë' bö' xihui' yú'ugaca bönachi. ¹⁶ Caní nácagaca lágaquië':

Simón, (buzóë' Jesús ia'tú lë', Pedro),

¹⁷ Jacobo,

Juan, (bönni' bóchë'ë Jacobo, ate' nácagaquië' zxí'inë' Zebedeo.

Chopë' ni, Jesús buzóë' ia'tú lágaquië', Boanerges, le rnna lu didza' xidza': Bönni' sínia' ca guziú'),

¹⁸ Andrés, Felipe, Bartolomé, Mateo, Tomás,

Jacobo, (zxí'inë' Alfeo),

Tadeo,

Simón, (bönni' ruí'i ládxë'ë yödzö queë'),

¹⁹ Judas Iscariote, (bönni' udödë' Jesús lu ná'agaquië' bönni' ilútië' Lë').

Yugu' bönni' yudo' ta'nné': "Tu' xihui' dzaga Jesús"

(Mt. 12:22-32; Lc. 11:14-23; 12:10)

Gudödi ni' Jesús len bönni' dá'gaquië' Lë' bulu'dxinë' tu lu yu'u.

²⁰ Leyúbölö bila'guíró bönachi zían ga zoë' Jesús, ate' bíti'rö guta' lataj bi ilahuë' Jesús, en bönni' na' dá'gaquië' Lë'. ²¹ Cate' di'a dza queë' Jesús bila'yönnë' ca raca queë', bila'dxinë' ni' para ulu'ché'ë Lë', ta'nné': Richixi icjë'.

²² Lësca' caní bönni' yudo' usedi, narúajgaquië' Jerusalén gula'nné' queë', ta'nné':

—Dzaga Belzebú, xángaca bö' xihui' Lë', ate' len yöl-la' unná bë' que rubéajë' yugu' bö' xihui'.

²³ Ní'irö Jesús bulidzë' yugu' bönni' yudo' usedi na', en bucúdzu'ë didza', rnnë':

—¿Naru' ubéaj la' cuinsi Satanás tu' xihui'? ²⁴ Channö ila'rúaj choplö bönachi tu yödzö, en ila'díl-lalen luzé'eguequi, biti' gaca idía' yödzö na'.

²⁵ Lësca' caní channö ila'rúaj choplö bönachi nacuá' tu yu'u, en ila'díl-lalen luzé'eguequi, biti' gaca ila'día' bönachi nacuá' yu'u na'. ²⁶ Que lë ni na', channö Satanás tu' xihui' tá'baga' luzé'e, narúajgaca choplö bö' xihui'. Biti' gaca idía' yöl-la' unná bë' que, pero chizóa údxi que.

²⁷ 'Cuntu nu gaca tsu'u lidxë' tu bönni' nál-la, en cuéaj yöl-la' tsahui' queë' channö cabí gaga' zí'alö bönni' nál-la na', ate' ní'irö sequi' cuéaj le dzö'ö lidxë'.

²⁸ 'Le nácatë rea' libí'ili': Dios gaca uniti lahuë' bönachi ca naca yúgu'të dul-la' nabága'gaca, en ca naca yúgu'të didza' schanní' ta'nná,
²⁹ pero núti'tës nu inné schanní' queë' Dios Bö' Lá'ayi, catu caz uniti lahuë' Dios nu na'. Tsaz nabaga' xíguia' nu na'.

³⁰ Caní gunné' Jesús tu' ta'nné' queë' bönni' yudo' usedi na', ta'nné':
 —Tu' xihui' dzaga Lë'.

Nu naca xiné'ë Jesús, en bönni' bóché'ë

(Mt. 12:46-50; Lc. 8:19-21)

³¹ Ní'irö bila'dxinë' yugu' bönni' bóché'ë Jesús, enca' xiné'ë ga zoë'. Gula'cu'ë ló'alö, en gula'sól-lë'ë nu tsöjlidza Jesús. ³² Bönachi zían na' ró'gaca cuitë' Jesús gulé Lë', ta'nná:

—Yugu' bönni' bóchu'u, enca' xinó'o nacu'ë ló'alö, tu'lidzë' Li'.

³³ Bubi'ë didza' Jesús, gudxë' légaquië':

—¿Nuzxi caz na' xiná'a, en nupxi caz yugu' bönni' bócha'a?

³⁴ Ní'irö buyüë' nupa na' ró'gaca gásibi'ilë', rnnë':

—Buli'yútsöca'. Nupa ni nátagaca ca xiná'a, en yugu' bönni' bócha'a.

³⁵ Nu run ca ré'ënë' Dios, nu ni naca ca bi'i bócha'a, en bi'i zana' enca' xiná'a.

Rucúdzü'ë didza' Jesús ca naca queë' bönni' guz

(Mt. 13:1-9; Lc. 8:4-8)

4 ¹ Leyúbölö gusí lahuë' Jesús rusédinë' bönachi ga naca ra' nísado'. Bulu'dubi bönachi zían ga zoë', ate' gurenë' Jesús tu lë'e bárcodo' zxoal lu nisa na', en gurö'ë ni', ate' yúgu'të bönachi na' gula'cuá' luyú ra' nisa na'. ² Zían le busédinë' Jesús légaquië', bucúdzü'ë didza'. Tsanni ni' rusédinë' légaquië', rnnë':

³ —Guli'zé nágalí' didza' ni. Birúajë' tu bönni' guz, söjësië' xisedo'.

⁴ Tsanni ni' rúsië', gulasí bal-la xisedo' na' ra' nöza, ate' bila'dxinba' biguinnido', gulé'ajba' le. ⁵ Gulasí ia'bal-la xisedo' na' ga rö'ö guió'j ga bití' rö'ö yenni' yu. Bayón gula'lén xisedo' na' tu' cabí rö'ö yenni' yu.

⁶ Ní'irö cate' gulén gubidza, buquexu' le, ate' gubidxi, tu' cabí nun luí ga rë'. ⁷ Gulasí ia'bal-la xisedo' na' ga tu'lén lubá yötsi'. Cate' gula'lén xisedo' na', bulu'lén ca' lubá yötsi' na', en gula'röli le, ate' lë na' bësië' bití' bi bunödzej. ⁸ Gulasí ia'bal-la xisedo' na' ga naca luyú bëbu, ate' gula'zxón, en xitsá' ra' gula'bó'. Bulu'nödzej lë na' bësië'. Tu dxigu' xisedo' na' bësië' bunödzej ia'chí uruá' xisedo' ca'. Ia'tú bunödzej ia'tsónnalalaj ca', ate' ia'tú na' bunödzej ia'tú gayuá' ca'.

⁹ Ní'irö Jesús gudxë' légaquië', rnnë':

—Nu zoa nagui, en riyöni ral-la' uzé nagui.

Riguíxjö'ë Jesús bizx que rucúdzu'ë didza'*(Mt. 13:10-17; Lc. 8:9-10)*

¹⁰ Cate' chibugá'anë' tuzë' Jesús, bila'dxín nupa dá'gaca Lë' ga zoë', núngaca tsözxón idxínnutë' bönni' usëda queë', ate' gula'nábinë' Lë' bi sa'yéaj lë na' bucúdzu'ë didza'. ¹¹ Jesús gudxë' légaquië', rnnë':

—Libi'ili' nadéli'li' tséajni'ili' le nagachi' ca rinná bë'ë Dios, pero nupa na' biti' nácgaca tuz len rë'u, ruí'ilená' légaquië' didza' yugu' le rucúdzu'a didza'. ¹² Caní runa' para gaca lë na' nazúaj lu guichi lá'ayi, rna:

Ulu'yúë', en biti' ila'lé'enë'.

Ulu'zé nácgacaquië', en biti' ila'yéajni'inë'.

Biti' ulu'bí'i ládxi'gaquië' para gaca uniti lahua' légaquië' ca naca dul-la' nabága'gaquië'.

Riguíxjö'ë Jesús le bucúdzu'ë didza'*(Mt. 13:18-23; Lc. 8:11-15)*

¹³ Jesús gudxë' ca' yugu' bönni' dá'gaquië' Lë', rnnë':

—¿Naru' cabí réajni'itseli' lë na' bucúdzu'a didza'? ¿Nacxi caz gaca tséajni'ili' ia'zíca'rö le ucúdzu'a didza'? ¹⁴ Bönni' guz na' náquië' nu ruzé xtídzë'ë Dios.

¹⁵ 'Nácgaca bal-la bönachi ca xisedo' na' gulasí ra' nöza. Ta'yönnë' xtídzë'ë Dios, en ca ta'yónisinë' ca', la' za'të Satanás tu' xihui', en rigúa didza' na' bidxín lu icja ládxi'do'gaquië'.

¹⁶ 'Nácgaca ia'bal-la bönachi ca xisedo' na' gulasí ga rö'ö guiój. Ta'yönnë' didza' na', ate' len yöl-la' rudzeja quégaquië' ta'zi'ë le. ¹⁷ Biti' riyaza icja ládxi'do'gaquië', ate' tu chí'isö ta'dé'ë le. Cate' bi raca quégaquië', o zoa nu ribía ladxi' légaquië' tu' ta'dé'ë didza' na', la' tu'huóatë ládxi'gaquië'.

¹⁸ 'Nácgaca ia'bal-la bönachi ca xisedo' na' gulasí ga na' tu'lén lubá yötsi'. Ta'yönnë' didza' na', ¹⁹ pero tuí'i ládxi'gaquië' le nácgaca que yödzölió ni. Nazí' yé'eguequinë' tu' nadxí'iguequinë' yugu' yöl-la' tsahui', en ta'zé ládxi'gaquië' yugu' le dë. Ta'yaza icja ládxi'do'gaquië' yúgu'të lë ni, en tu'suniti didza' na', para cabí gun dxin lu icja ládxi'do'gaquië'.

²⁰ 'Nácgaca ia'bal-la bönachi ca xisedo' na' gulasí ga naca luyú bëbu. Ta'yönnë' didza' na', en ta'zí' lu ná'agaquië' le, ate' run dxin lu icja ládxi'do'gaquië'. Nácgaca bal-la bönachi caní ca xisedo' na' bulu'nödzaj ia'chí uruá' huéaj. Nácgaca ia'bal-lë' ca xisedo' na' bulu'nödzaj ia'tsónnalalaj ca', ate' nácgaca ia'bal-la bönachi ca xisedo' na' bulu'nödzaj ia'tú gayuá' ca'.

Rucúdzu'ë didza' Jesús que tu le rigú'u bení'

(Lc. 8:16-18)

²¹ Jesús gudxë' ca' bönni' dá'gaquië' Lë', rnnë':

—¿Naru' rigála'ru' guí', ate' rudúsi'ru' le tu guí'ina, o rigú'uru' le zxani le ráti'ru'? Biti' ca' runru' caní. Ruzóaru' guí' ga naca xitsá' ga cu'u bení'. ²² Yúgu'të le nagachi' ilá' lahui, ate' yúgu'të le raca balándo'os ila'rúaj ga liná'. ²³ Nu zoa nagui, en riyöni ral-la' uzé nagui.

²⁴ Gudxë' ca' légaquië':

—Guli'güi' ládxi'li' le riyónili'. Ca naca le ruríxili', la' leze urixë' Dios queé'li', ate' gunné' queé'li' ia'lati'. ²⁵ Nu nazí'i le za' que, gu'ë que ia'lati', pero nu bití' nazí'i le, la's dui le dë que, udúa.

Rucúdzu'ë didza' Jesús ca rizxón xzoa' xtila

²⁶ Gunné' ca' Jesús:

—Ca raca ni le rinná bë'ë Dios naca ca raca cate' ruchejë' tu bönni' xzoa' xtila lu yu. ²⁷ Chi'i dzó'ölö rásië', en riyasë' cate' za' rení'. Ta'lén xzoa' xtila na', en ta'zxón, pero bití' nózinë' lë' nacxi raca ta'zxón. ²⁸ La' cuinsi luyú na' ruxón le nadúzgaca luyú na', zí'alö xiyazi, ní'irö za' do que, en tödi na' cuía xui'i nál-la lu do que. ²⁹ Cate' chinal-la xui'i na', la' tséajtë' tsöjchibë' do na' tu' chibidxín dza uzi'ë xui'i.

Rucúdzu'ë didza' Jesús ca raca que xisé mostaza

(Mt. 13:31-32; Lc. 13:18-19)

³⁰ Gunné' ca' Jesús:

—¿Bizxi caz innaru' ca raca ni le rinná bë'ë Dios? ¿Bizxi ucúdzu'ru' didza' ca raca? ³¹ Raca ca raca que tu xisedo' mostaza. Cate' riyaza luyú naca tu xisedo' nácatërö cuidi' ca yúgu'të xisedo' dzö'ö luyú, ³² pero cate' chinadúz, rilén, en rizxöntërö ca yúgu'të guixi' cuan ró'gaca luyú. Tsca run yana' ni'a në'e, gaca ila'dxinba' bigúinnido', en ulu'dxíaba' xicá'agacaba' lu zxul-la que.

Ca rugunë' dxin Jesús le rucúdzu'ë didza'

(Mt. 13:34-35)

³³ Caní guca, busédinë' Jesús légaquië', en zíanrö ca' le bucúdzu'ë didza' tsca guca ila'yéajni'inë'. ³⁴ Yúgu'të didza' bé'lenë' bönachi bucúdzu'ë didza', ate' yúgu'të didza' ni buchila lá'anë', buzéajni'inë' légacasë' bönni' usëda queë'.

Jesús ribequi dxíë' bö' budunu'

(Mt. 8:23-27; Lc. 8:22-25)

³⁵ La' dza ná'asö, cate' ridzö', Jesús gudxë' yugu' bönni' dá'gaquië' Lë', rnnë':

—Tóðitsöca'ru' ia'tsölá'a nísado' ni.

³⁶ Ní'irö bulu'lá'alenë' bönachi zían nacuá' ni', ate' bulu'sé'ë bárcodo' ga na' chizóasë' Jesús. Gula'cuá' ca' ni' ia'zica'rö bárcodo' sōjácálen légaquië'. ³⁷ Gusí lo recja bö' budunu' lu nisa na', ate' gudá'a nisa lë'e bárcodo' na'. Ca' guca, zeaj ridzá' nisa lë'e bárcodo' na'. ³⁸ Dë' rásië' Jesús lu xicúgüë' ga naca xitsá'alö lë'e bárcodo' na', ate' bulu'subanë' Lë'. Të' Lë':

—iBönni' Usedi! ¿Naru' cabí ruí'i ládxi'tso' netu'? iHuáti caztu' lu nisa ni!

³⁹ Ní'irö guyasë' Jesús, en gunná bé'enë' bö' na' recja, gunné':

—Guró'ö dxi.

Gudxë' ca' nisa na', gunné':

—Dxisö guzóa.

Guró'ö dxi bö' na' guyecja, en guzóa dxi lu nísado' na'. ⁴⁰ Ní'irö Jesús gudxë' yugu' bönni' dá'gaquië' Lë', rnnë':

—¿Bizx que radxi ridzóbili' caní? ¿Naru' cabí réajlë'ëli' Dios?

⁴¹ Ni' tádxinë' gulé luzé'ë tuë' ia'túé':

—¿Nuzxi caz bönni' ni? iTun bö' recja, en nísado' ca rnna xtídzë'ë!

Bönni' Gadara yu'u bö' xihui' lë'

(Mt. 8:28-34; Lc. 8:26-39)

5 ¹ Ní'irö bila'dxinë' Jesús, en yugu' bönni' dá'gaquië' Lë' ia'tsölá'a nísado' ga naca lu xiyúgaca bönachi Gadara. ² Cate' burúajë' Jesús lë'e bárcodo' na', tu bönni' rirúajë' znan bulóaj ga nacuá' yeru ba la' dutsáгатë' Lë'. Bönni' ni yu'u bö' xihui' lë', ³ ate' nun xilatjë' ga na' nacuá' yeru ba. Cuntu nu guca guga' bönni' na', calëga len du guíë. ⁴ Zían luzuí bulu'zóë' bregui' guíë yen në'ë, en ni'ë, en gulúgui'ë lë' du guíë. Yugu' du guíë na' bulé'ë, ate' bregui' guíë na' guditsjë'. Biti' rizéqui'në' nu bönni' inná bé'enë' lë'. ⁵ Ridática'së' ribódxí'ë rëla, en tē dza ga na' nacuá' yeru ba, en gapa naca lu guí'ado', run huë' cuinë' yugu' lu guió'j dzö'ö ni'. ⁶ Cate' bilé'enë' zë'ë zi'tu' Jesús, guxítí'ë guyijë' ga na' zë'ë, ate' buzóa zxibë' lahuë' Lë'. ⁷ Bë'ë zidzaj didza', rë' Jesús:

—¿Bizxi ral-la'a quiu' Jesús, Zxí'inë' Dios nayépisëtërë'? Ni'a queë' Xanru' Dios ráta'yua' lo', biti' usaca' zi'u neda'.

⁸ Caní gunné' bönni' na' tu' chigudxë' Jesús bö' xihui' na':

—Li', bö' xihui', burúaj lu bönni' ni.

⁹ Jesús gunábinë' le, rnnë':

—¿Bi leu'?

Bubí'i didza' le, gudxi Lë':

—Lea': Le Zían, tu' rö'ö ziantu'.

¹⁰ Gula'nabi yechi' yugu' bö' xihui' na' Jesús para cabí isól-lë'ë léguequi zi'tu' luyú ni'. ¹¹ Nacuá'aba' cuchi zían lu guí'ado' ní'isö, ta'daba' táguba' ni'. ¹² Gula'nabi yechi' bö' xihui' na' Jesús, ta'nná:

—Gusöl-la' netu' ga ni' dzó'öba' cuchi zián. Bë' netu' lataj tsöjtsú'ugacatu'-ba'.

¹³ La' bë'të' Jesús léguequi lataj, ate' bila'rúaj bö' xihui' na', en yöjtsú'ugaca cuchi zián na', ate' gula'xíti'ba' cuchi zián na', yöjbíxigacaba' ga naca ra' guí'a, yöjcházagacaba' nísado'. Lu nísado' na' gula'yépiba' nisa, gulátiba', en nácagacaba' ca galaj gayuá'aba'.

¹⁴ Ní'irö bulu'zxunnaj nupa ni' gulún chi'i cuchi zián na'. Yöjtíxjöi'iguequinë' bönachi lu yödzo ni', enca' bönachi nacuá' la' guixi' ni'. Bila'rúaj bönachi lu yödzö, söjyúgaquië' bizxi na' guca ni'. ¹⁵ Cate' bila'dxinë' ga ni' zoë' Jesús, bila'lé'enë' bönni' na' zí'alö yú'ugaca bö' xihui' lë'. Bönni' ni rö'ë ni', nácuë' lari', en zoë' dxí'ado', ate' guladxi bönachi na'. ¹⁶ Nupa na' bila'lé'e le benë' Jesús gula'guíxjöi'i bönachi na' bila'rúaj lu yödzo ca na' guca queë' bönni' na' zí'alö yú'ugaca bö' xihui' lë', enca' ca guca quégacaba' cuchi na'. ¹⁷ Ní'irö gula'sí lógaca bönachi zián na' ta'ta'yu lahuë' Jesús urúajë' lu xiyúguequi.

¹⁸ Cate' bubenë' Jesús lë'e bárcodo', bönni' na' zí'alö yú'ugaca bö' xihui' zián lë', gúta'yuë' lahuë' Jesús gu'ë lë' lataj tséajlenë' Lë'. ¹⁹ Jesús biti' bë'ë lë' lataj, pero gudxë' lë':

—Böaj lidxu'. Yöjtíxjöi'i di'a dza quiu' yugu' le zxön bena' quiu' neda', naca' Xanu', en ca bena' buéchi' ládxa'a li'.

²⁰ Söhuójë' bönni' na', en ruzé' didza' yugu' yödzo Decápolis ca nácagaca le zxön benë' Jesús queë', ate' bulu'bani yúgu'të bönachi nacuá' yugu' yödzo ni'.

Bi'i nigula queë' Jairo, en nigula na' gudannu lari' nácuë' Jesús

(Mt. 9:18-26; Lc. 8:40-56)

²¹ Cate' budxinë' Jesús ia'tsölá'a nísado' na', ní'irö bulu'dubi bönachi zián ga na' zoë' ra' nísado'. ²² Bönni' lë' Jairo, bönni' rinná bë'ë lu yu'u ga tu'dubë' bönni' judío, en nazëdë' queë' Dios, bidë' ga zoë' Jesús. Cate' bilé'enë' Jesús, buzóa zxibë' lahuë', ²³ en gúta'yuë' lahuë', rnnë':

—Chiraqui gátibi' bi'i nigúlado' quia'. Gudá ixóa no'o lëbi' para huóacabi', en biti' gátibi'.

²⁴ Sa'yéajlenë' Jesús lë', ate' bönachi zián söjácacen Jesús, tu'quirö Lë'.

²⁵ Tu nigula, chinaca chinnu iz ré'enu, zóanu ca' ni'. Biti' ruhuí'i rön queénu que huë' quégaca cázanu nigula. ²⁶ Yenni' chigudí'i guzxáca'nu lu ná'agaquië' zián bönni' tu'únë' bönachi. Nítisö chibutönu dëra le dë queénu, tu' cabí bi gúcalen lënu, pero riyali' queénu. ²⁷ Cate' biyóninu tuí'i didza' bönachi ca naca queë' Jesús, gudódinu ládjalö bönachi zián na', en bidxinnu zaca' cúdzu'lë' Jesús, en gudannu lari' nácuë'. ²⁸ Caní bennu tu' rnnanu: “Channö cansa' le nácuë', huóaca'.” ²⁹ La' buí'itë rön queénu, ate' réquibe'enu chibóácanu que le guca queénu.

³⁰ La' gúquibe'etenë' Jesús ben dxin yöl-la' huáca queë', ate' buécjë', ruyúë' bönachi zián na'. Rnnë':

—¿Nuzxi na' gudán neda'?

³¹ Ní'irö bönni' dá'gaquië' Lë' tē' Lë', ta'nnë':

—Rilé'e quézinu' bönachi zían ni tu'quirö Li', en rnnatso': “¿Nuzxi na' gudán neda'?”

³² Ruyüë' Jesús gásibi'ilë' para ilé'enë' nuzxi na' gudán Lë'. ³³ Ní'irö nigula na' gubíga'nu lahuë'. Rádxinu, en rizxízinu tu' chinózinu bi na' guca queénu, ate' buzóa zxíbinu lahuë' Jesús, en gúdxinu Lë' idútē le nácatē. ³⁴ Jesús rē'ē-nu:

—Nigúlado'. Chiböácu' tu' réajlë'u neda'. Böaj lidxu' idú ládxi'u. Tsaz nuhuöácu' que le guca quiu'.

³⁵ Tsanni ni' ru'ë caní didza' Jesús, bönni' narúajgaquië' lidxë' bönni' na' rinná bē'ē lu yu'u ga tu'dubē' tu'sedē' queë' Dios bila'dxnē' ni', en tē' bönni' na':

—Chigútibi' bi'i nigúlado' quiu'. Bítirö upízxjanu' Bönni' Usedi.

³⁶ Biti' bē' ládxi'ē Jesús lē na' ta'nnë', ate' gudxë' bönni' unná bē' na', rnnë':

—Biti' gádxinu'. Guyéajlë'ēsē' Dios.

³⁷ Biti' bē'ē lataj Jesús tsöjácálen Lë' ia'zícá'rö bönachi, pero légacasē' Pedro, en Jacobo, en Juan, bóchē'ē Jacobo na'. ³⁸ Cate' bidxinë' lidxë' bönni' na' rinná bē'ē ga tu'dubē' tu'sedē' queë' Dios, bilé'enë' raca dzatsa, enca' nupa ni' ta'bödxí, en nupa ta'bödxí yechi'. ³⁹ Guyázië' Jesús, en gudxë' légaquië':

—¿Bizx que rutsátsali', en ribódxili' caní? Biti' nátibi' bi'i nigúlado' ni. Rásisibi' na'.

⁴⁰ Ní'irö bulu'titjē' Jesús, pero Lë' bubéajē' yúgu'tē bönachi na' ní'ilö, ate' guchē'ē xuz xiná'abi' bi'i nigúlado' na', enca' nupa nacuá'len Lë', ate' guyázië' ga na' dēbi'. ⁴¹ Gudélē'ē ná'abi' bi'i nigúlado' na', en gudxë'-bi':

—Talita, cumi.

Didza' hebreo ni rnna lu didza' xidza': Bi'i nigúlado', guyasa. ⁴² La' guyásatēbi' bi'i nigúlado' na', en buzé'ebi'. Chiyú'ubi' chinnu iz. Bulu'bani nupa nacuá' ni'. ⁴³ Ní'irö Jesús gunná bē'enë' légaquië' cuntunu ulu'siyönnē' lē na' guca. Gudxë' légaquië':

—Guli'güí' le gágubi' bi'i nigúlado' ni.

Ridxinë' Jesús Nazaret, le naca ladzë'

(Mt. 13:53-58; Lc. 4:16-30)

6 ¹ Buzé'ē Jesús ni', budxinë' ladzë', ate' yugu' bönni' dá'gaquië' Lë' sōjácálenē' Lë'. ² Cate' bidxín dza lá'ayi quégaquië' bönni' judío, gusí lahuë' Jesús rusédinē' bönachi ga na' tu'dubē' tu'sedē' queë' Dios. Gula'cuá' bönachi zían ni' ta'yöni Lë'. Bulu'bani, ta'nná:

—¿Gazxi caz bizédē' bönni' ni yugu' lē ni? ¿Bizxi caz yöl-la' réajni'i ni nadéli'nē'? ¿Nacxi caz runē' le nácgaca bē' na' zá'gaca yehua' yubá?

³ Náquië' bönni' ni gubëdxi yaga na', en xzí'ininu María. Náquië' böchi'gaquië' Jacobo, en José, en Judas, en Simón. Nígula zanë' nacuá'lennu ca' rë'u.

Que lë ni na' bulu'cá'anë' Lë' cá'asö. ⁴ Ní'irö Jesús gudxë' légaquië', rnnë':

—Gáti'tës tunë' bal nu bönni' ru'ë didza' uláz queë' Dios, pero bönachi uládz queë', en bönachi di'a dza queë', en bönachi nacuá' lidxë' biti' tun lë' bal.

⁵ Que lë ni na' biti' guca gunë' Jesús nitú yöl-la' huáca zxön ni'. Bunsë' nabábasö bönachi te'e cate' guxóa në'ë léguequi. ⁶ Bubáinë' Jesús tu' cabí ta'yéajlë' Lë'. Gudödi na' gudödë' yugu' yödödo' nacuá' gásibi'ilö, rusédinë' bönachi ni'.

Risól-lë'ë Jesús bönni' dá'gaquië' Lë' tsöjéngaquië' libán

(Mt. 10:5-15; Lc. 9:1-6)

⁷ Ní'irö bulidzë' Jesús idxínnutë' bönni' dá'gaquië' Lë', en gusí lahuë' risól-lë'ë légaquië' chopa huéajgaquië'. Budödë' lu ná'agaquië' yöl-la' unná bë' ulu'béajë' yugu' bö' xihui' yú'ugaca bönachi. ⁸ Gunná bé'enë' légaquië' biti' bi ilu'ë la' nöza, calëga yöxaj, calëga yöta, en calëga dumí biti' ila'gu'ë lu buzudi quégaquië', pero iluá'asë' xiyágado'. ⁹ Ral-la' ulu'dé'ë xiráchugaquië', pero calëga chopa lari' ulu'xóca yéngaquië'.

¹⁰ Gudxë' ca' légaquië':

—Gáti'tës ga tsú'uli' tu yu'u, guli'sóca yu'u na' cate' uzá'aröli' yödzö na'. ¹¹ Channö tsú'uli' tu yödzö ga biti' ilún bönachi lu yödzö na' libí'ili' bal, en biti' ulu'zë' nágagaquië' xtídza'li', buli'rúaj ni', en buli'quínnaj bëchtö da' lë'e lábali'. Lë ni gaca bë' nabága'gaquië' xíguia'. Le nácatë rea' libí'ili', cate' idxín dza ichúguië' Dios quégaca bönachi, ila'guí'i ila'záca'rö bönachi lu yödzö na' ca ila'guí'i ila'záca' bönachi Sodoma, en Gomorra, yugu' yödzö na' busunítië' Dios.

¹² Ní'irö bila'rúajë' bönni' dá'gaquië' Lë', yöjéngaquië' libán ca ral-la' ulu'bí'i ládi'gaca bönachi. ¹³ Bulu'béajë' zían bö' xihui' yú'ugaca bönachi. Gula'gu'ë le za zían nupa te'e, ate' bulu'huóáquië'.

Ca bétigaquië' Juan, bönni' buquilë' bönachi nisa

(Mt. 14:1-12; Lc. 9:7-9)

¹⁴ Biyönnë' Herodes, bönni' unná bë', ca naca le runë' Jesús, tu' rizé didza' gáti'tës que yöl-la' huáca queë'. Bal-la bönachi ta'nná:

—Chibubanë' Juan, bönni' ni' buquilë' bönachi nisa, lu yöl-la' guti. Que lë ni na' napë' yöl-la' huáca runë' yugu' lë ni.

¹⁵ Ia'bal-la bönachi ta'nná:

—Naquië' Elías, bönni' bë'ë didza' uláz queë' Dios dza ni'te.

Ia'bal-la bönachi ta'nná:

—Naquië' bönni' ru'ë didza' uláz queë' Dios ca guláquië' bönni' gulu'ë didza' uláz queë' dza ni'te.

¹⁶ Cate' biyönnë' Herodes yugu' lë ni, gunné':

—Naquië' Juan, bönni' na' burixa' yenë'. Chibubanë' lu yöl-la' guti.

¹⁷ Caní gunné' Herodes tu' gusól-lë'ë lë cazë' bönni' yöjxôngaquië' Juan na', ate' gulúgui'ë lë' du guíë lu yu'u lidxi guíë. Caní benë' Herodes tu' rilenu Herodías Juan na'. Nácanu nigula na' gúcanu nigula queë' Felipe, bóchë'ë Herodes na'. Herodes gudúë'-nu Herodías na', en butsa ná'alënë'-nu. ¹⁸ Juan na' gudxë' Herodes:

—Biti' ral-la' sóalenu'-nu nigula queë' bóchu'u.

¹⁹ Que lë ni na' gusí guró'önu Herodías. Gú'uninu bi gunnu queë' Juan, tu' gú'uninu gútinu lë', pero biti' bi guzxéqui'nu ²⁰ tu' rádxiñë' Herodes Juan. Nózine' náquië' Juan na' tsahui', en lá'ayi. Que lë ni na' gudapa chi'ë lë', en buzë náguië' lë' idú ládxë'ë sal-la' lë na' rnnë' Juan ben ga gurö'ë böniga Herodes na'. ²¹ Ní'irö bidxín tu dza guzxéqui'nu Herodías na', le naca dza runë' Herodes laní que dza guyé'enë' iz. Bupé'ë le ilë'aj ilahuë' bönni' dë lu ná'agaquië' uláz queë', en bönni' ta'nná bé'enë' bönni' röjáquië' gudil-la, enca' bönni' nácagaquië' lo luyú Galilea. ²² Guyázabi' bi'i nigula queënu Herodías ga na' tē'aj tahuë', en buyá'abi' lógaquië'. Guyaza ládxë'ë Herodes ca runbi', en gula'yaza ládxigaca ca' nupa tē'aj tágulen lë'. Ní'irö Herodes gudxë'-bi' bi'i nigula na', gunné':

—Gunaba bi ré'ënu' gunna' quiu', ate' guna' ca'.

²³ Benë' tsutsu xtídzë'ë, gudxë'-bi':

—Ni'a queë' Xanru' Dios gunna' quiu' bíti'tës bi inabu' ga idxintë gatsaj ga rinná bë'a.

²⁴ Burúajbi' lëbi', ate' gunábabi' xiná'abi':

—¿Bizxi inábatsa'?

Lënu gúdxinu-bi':

—Icjë' Juan, bönni' buquilë' bönachi nisa, inabu'.

²⁵ La' buázatëbi' ga na' zoë' Herodes, en rëbi'-në':

—Rë'ënda' ixú' quia' na'a lu zxiga' zxön icjë' Juan, bönni' na' buquilë' bönachi nisa.

²⁶ Ní'irö buí'innë' Herodes, pero tu' buzötjë' Dios, en tu' bila'yöni ca' nupa tágulen lë', biti' gú'unnë' initi xtídzë'ë na' guzxí' lu në'ë queëbi'.

²⁷ Herodes la' gusól-la'të' tu bönni' rejë' gudil-la zoë' rapa chi'ë, ate' gunná bé'enë' lë' tsöjxi'ë icjë' Juan. ²⁸ Bönni' na' rejë' gudil-la guyijë' lidxi guíë, yöjrixë' yen Juan na', ate' bu'ë icjë', nuxóë' le tu lu zxiga' zxön. Budödë' le lu ná'abi' bi'i nigula na', ate' lëbi' bunódzjabi' le queënu xiná'abi'.

²⁹ Cate' bönni' dá'gaquië' Juan na' bila'yönnë' didza' chiguca lë na', bila'dxinë' ni', en bulu'ú'ë lë', ate' yöjcáchi'gaquië' lë' yeru ba.

Rugahuë' Jesús zíanrö ca chi-un gayuá' bönachi

(Mt. 14:13-21; Lc. 9:10-17; Jn.6 :1-14)

³⁰ Gudödi ni' bulu'dubë' bönni' gubáz queë' Jesús ga zoë', en gula'guíxjöi'inë' Lë' yúgu'të le gulunë', en yugu' le bulu'sédinë' bönachi.

³¹ Nacuá' bönachi zían ni', nupa zá'gaca, en nupa sōjaca, ga bidxintë bítirö dë lataj ilahuë' Jesús, en yugu' bönni' dá'gaquië' Lë'. Que lë ni na' Jesús gudxë' légaquië', rnnë':

—Guli'dá. Uyéaj cázaru' ga naca lataj cá'asö, en uzí' ládxi'ru' tu chi'i.

³² La' légacasë' yōjáquië' tu lë'e bárcodo', ate' bila'dxinë' tu lataj cá'asö. ³³ Bila'lé'e bönachi zían légaquië' sōjáquië' ni', en núnbë'gaca Jesús. Que lë ni na' bönni' yúgu'të yōdzö ni' carelö yōjáquië' ni'. Gula'zë'e ní'agaquië', ate' bila'dxinë' ni' zí'atëlö ca Jesús, en yugu' bönni' dá'gaquië' Lë'. ³⁴ Cate' burúajë' Jesús lë'e bárcodo' na', bilé'enë' bönachi zían na', ate' buéchi' ládxië' légaquië' tu' nácagaquië' ca bö'cu' zxíla'do' bití' zoa nu gapa chi'i légacaba'. Gusí lahuë' rusédinë' légaquië' le zían. ³⁵ Cate' chiridzō' dza na', yugu' bönni' dá'gaquië' Jesús bila'dxinë' ga zoë', en tē' Lë':

—Chiridzō', ate' lataj cá'asö naca ni. ³⁶ Busöl-la' bönachi zían ni para tsōjaca yugu' yú'udo', en yugu' yōdzōdo' nacuá' gásibi'ilö, tsōjō'ugaca yōta, tu' cabí bi dë ni le ilagu.

³⁷ Bubi'ë didza' Jesús, gudxë' légaquië':

—Guli'güí' libí'i cázali' le ilahuë'.

Gulé' Lë':

—¿Naru' tsōjō'utsatu' yōta xtila len lászjatu' que idú xunu' beo', ate' güí'itu' le ilahuë'?

³⁸ Jesús gudxë' légaquië':

—¿Bal-laxi yōta xtila dë queé'li'? Guli'tsōjyútsöca'.

Cate' chinōziguequinë', tē' Lë':

—Gáyu'sö yōta xtila dë, en chópasöba' böla dëba'.

³⁹ Ní'irö gunná bë'ë Jesús ilunë' ga ila'bó' bönachi zían na', ila'cuá' tu cō' huéajguequi ga naca lachi' lu dāca'. ⁴⁰ Gula'cu'ë tu cō' huéajgaquië', tu gayuá' huéajgaquië', en chi-un huéajgaquië'. ⁴¹ Ní'irö gudélë'ë Jesús igáyu'të yōta xtila na', en irópaba' böla na'. Buyúë' zaca' lúzxiba, en gudxë' Dios: “Xclenu'.” Ní'irö buzuxzjë' yōta xtila na', en bë'ë quégaquië' bönni' usëda queë' para ila'guísië' quégaca bönachi zían na'. Gudísië' ca' irópatëba' böla na' quégaca yúgu'të bönachi na'. ⁴² Gulahuë' yúgu'të', en bulu'huóljanë'. ⁴³ Ní'irö bulu'tubë' le bizxaj que yōta xtila na', en quégacaba' böla, ate' chinnu ga'böra bulu'lié'. ⁴⁴ Guláquië' ca chi-un gáyu'ë bönni' na' gulahuë'.

Rizë'e ni'ë Jesús lu nísado'

(Mt. 14:22-27; Jn.6 :16-21)

⁴⁵ La' bentë' Jesús ga gula'benë' yugu' bönni' dá'gaquië' Lë' lë'e bárcodo', para ila'nóruë' lahuë', ila'dödë' lu nísado' na', para ila'dxinë' lu yödzö Betsaida, tsanni ni' Lë' rusöl-lë' bönachi zián na' lídxiguequi.

⁴⁶ Cate' chibudxi busöl-lë' légaquië', guyijë' tu lu guí'ado', ate' ni' ruí'ilenë' Dios didza'. ⁴⁷ Cate' chizá' ral-la, zeaj bárcodo' na' gatsaj láhui'lö nísado', ate' zoë' Jesús tuzë' luyú bidxi na'. ⁴⁸ Bilé'enë' Jesús légaquië', böniga tu'sé'ë bárcodo' na' tu' recja bö' za' ga na' ta'dödë'. Gudödi guluhuëla bidxinë' Jesús ga na' nacué', rizë'e ni'ë lu nísado' na', ate' gú'unnë' tódisë' ga na' nacué'. ⁴⁹ Cate' bila'lé'enë' Lë' rizë'e ni'ë lu nísado', guléquinë' bixín na', ate' gula'bódxí'ë ⁵⁰ tu' bila'lé'enë' yúgu'të' Lë', en guladxi gula'dzöbinë'. Ní'irö la' bulidztë' Jesús légaquië', rnnë': —Buli'tipa ládxi'li'. Neda' caz. Biti' gádxili'.

⁵¹ Gurenë' Jesús lë'e bárcodo' ga na' nacué', ate' guró'ö dxi bö' na' recja, ate' légaquië' gula'niti gula'tíqui'sinë' bulu'bánninë'. ⁵² Biti' ta'yéajni'ininë' le ruluí'i lë na' benë' Jesús que yöta xtila na'. Ni' naca zidi icja ládxi'do'gaquië'.

Ruúnë' Jesús nupa te'e lu yödzö Genesaret

(Mt. 14:34-36)

⁵³ Gula'dödë' Jesús, en yugu' bönni' dá'gaquië' Lë' ia'tsölá'a nísado', ate' bila'dxinë' ga naca lu xiyúgaca bönachi Genesaret. Bulu'dxíguë'ë bárcodo' luyú bidxi ni'. ⁵⁴ Cate' bulu'rúajë' lë'e bárcodo' na', la' bulu'únbë'të bönachi ni' Jesús. ⁵⁵ Gula'xiti' bönachi na', yöjaca yúgu'të yódzödo' idú gásibi'ilö, en gula'sí lógaquië' dujuá'agaquië' yúgu'të nupa te'e ga zoë' Jesús, zxóagaca yugu' le déguequini, ate' bila'dxinë' gátitës ta'yönnë' zoë' Jesús. ⁵⁶ Gátitës ga ridödë' Jesús, yugu' lu yódzödo', en yugu' yödzö zxön, en yugu' yú'udo', tu'cu'ë nupa te'e quégaquië' gapa naca la' nöza, en gapa naca lu yé'ëyi, en ta'tá'yuë' lahuë' Jesús gul'ë légaquië' lataj ila'gansë' luzxi lari' nácuë'. Yúgu'të nupa na' bila'gán lari' nácuë' bulu'huöacatë dxí'ado'.

Le tun ga bití' nácgaca bönachi tsahui' lahuë' Dios

(Mt. 15:1-20)

7 ¹ Ní'irö bal-lë' bönni' yudo' fariseo len bal-lë' bönni' yudo' usedi narúajgaquië' Jerusalén, bulu'dubë' ga zoë' Jesús. ² Bönni' yudo' ni bila'lé'enë' bönni' usëda queë' Jesús tahuë' yöta, bití' nuchí'agaquië' ná'agaquië', lë na' rnna: Biti' nayárigaca ca nalébiguequinë' tunë' bönni' yudo' na'. Que lë ni na' gula'nnë' quégaquië'. ³ Yugu' bönni' yudo' fariseo na', en ia'zica'rö bönachi judío tunë' ca gulébiguequinë' gulunë' xuz xtó'ogaquië', ate' channö cabí ta'guíbi ná'agaquië' zián luzuí ca na'

nalébiguequinè' tunè', bitì' ca' tahuè'. ⁴ Cate' tu'dxinè' rōjō'ugaquiè' lu yé'ëyi, channō cabí ta'guibè' lè na' ca nalébiguequinè' tunè', bitì' ca' tahuè'. Ziánrō ca' tunè', yugu' le nalébiguequinè' tunè'. Caní ta'guibè' zxiga' yó'ōna, en yugu' zxiga' guíë, en yugu' le tātì'nè'. ⁵ Que lè ni na' yugu' bōnni' yudo' fariseo, en yugu' bōnni' yudo' usedi gula'nábinè' Jesús, ta'nné':

—¿Naru' cabí tunè' yugu' bōnni' usēda quiu' ca gulébiguequinè' gulunè' xuz xtó'oru', pero tahuè' yōta bitì' nuchí'agaquiè' ná'agaquiè'?

⁶ Bubi'è didza' Jesús, rē' légaquiè':

—Libí'ili', bōnni' ruluí'isō tsahui' cuinli'. Nácatè le gudíxjō'è Isaías, bōnni' ni' bè'è didza' uláz queè' Dios, ca naca queéli'. Buzúajè' lu guichi, gunné':

Yugu' bōnni' ni, len rú'agacasè' tunè' neda' bal,
calèga idú lādxi'gaquiè'.

⁷ Níti'sō naca yōl-la' ba ta'gu'è neda'
tu' tu'sédinè' le ta'nná bè' bōnachi,
calèga xibá quia'.

⁸ Caní naca, tu' rucá'anali' le gunná bè'è Dios, ate' runli' yugu' le nazí' láhuili' lu ná'agaca bōnachi.

⁹ Gudxè' ca' légaquiè':

—Idú lādxi'li' rucá'anali' cá'asō le gunná bè'è Dios para gunli' ca naca le nulaga loli' runli'. ¹⁰ Moisés gunné' caní: “Ben bal xuz xinó'o.” Gunné' ca': “Nu ulidza zi' xuzi o xinè'e, guli'gútité nu na'.” ^{11,12} Libí'ili' rnnali' caní: “Channō nu bōnni' guíë' xuzè' o xiné'è: Bitì' gaca bi gunna' queéli', tu' naca Corbán.” (Didza' ni rnna lu didza' xidza': Tu' nuzóa' quez queè' Dios yúgu'tè.) Ní'irō rnnali': “Bitì' run bayudxi bi gunè' bōnni' na' quégaquiè' xuz xiné'è.” ¹³ Caní naca, rucá'anali' cá'asō xtídzè'è Dios para gunli' le nulaga loli' runli', yugu' le rudódili' lu ná'agaca xzí'ini xi'sóali'. Ziánrō ca' le caní runli'.

¹⁴ Ní'irō Jesús bulidzè' bōnni' zían na' nacu'è ni', en rē' légaquiè':

—Guli'zé' nágali' didza' gu'a, yúgu'tèli', en guli'tséajni'i. ¹⁵ Bitì' bi dē le riyaza nu bōnni' le gaca gun ga bitì' náquiè' tsahui' lahuè' Dios, pero le rirúaj lè', lè ni gaca gun ga bitì' náquiè' tsahui' lahuè' Dios. ¹⁶ Channō zoa nágali', en riyónili', buli'zé' nágali'.

¹⁷ Cate' Jesús bulá'alenè' bōnachi zían na', guyu'è tu yu'u, ate' yugu' bōnni' usēda queè' gula'nábinè' Lè' ca naca lè na' bucúdzu'è didza'.

¹⁸ Jesús gudxè' légaquiè':

—¿Riyádzjatsō ca' queéli' yōl-la' réajni'i? ¿Naru' cabí réajni'ili', yúgu'tè le riyaza nu bōnni', bitì' gaca gun ga bitì' náquiè' tsahui' lahuè' Dios? ¹⁹ Naca caní tu' cabí riyaza icja lādxi'da'ahuè', pero lè'èsè' riyaza, ate' rurúaj lè'è.

Tu' gunné' caní Jesús, buluí'inè' rē'u naca dxi'a yúgu'tè le rē'aj ráguru'. ²⁰ Gunné' ca' Jesús:

—Le rirúaj lu bönni' run ga biti' náquië' tsahui' lahuë' Dios. ²¹ Caní naca, tu' ta'rúaj icja ládxi'do'gaquië' bönni' yugu' le ta'zá ládxi'gaquië' le naca xihui', yugu' le tun ga tunë' dul-la' ta'guitsjë' xibá que yöl-la' nutsaga na', en yugu' le ruá' dö'. Tun ga tútië' bönachi, ²² en ta'banë', en ta'zé ládxi'gaquië' le dë que luzá'agaquië', en tu'ë dö', en ta'zí yë'ë, en tu'zxë'ë, en ta'nná zi'ë que luzá'agaquië', en tun ba zxön cuíngaquië', en tunë' le canóz. ²³ Yúgu'të le xihui' caní ta'rúaj icja ládxi'da'ahuë' nu bönni', en tun ga biti' náquië' tsahui' lahuë' Dios.

Tu nigula izá'a réajlë'ënu Jesús

(Mt. 15:21-28)

²⁴ Buzé'ë Jesús ni', ate' bidxinë' gala' ga nacuá' yödzö Tiro, en yödzö Sidón. Guyázië' tu yu'u ni', en gú'unnë' cuntú nu inözi, pero biti' ca' guca ucachi' cuinë'. ²⁵ Tu nigula zóabi' bi'i nigúlado' queënu, yu'u bö' xihui' lëbi', biyóninu didza' rizé ca naca queë' Jesús, ate' la' bídatënu ga zoë' Jesús, en buzóa zxíbinu xini'ë. ²⁶ Nigula ni biti' nácanu judío, pero nabábanu bönachi Sirofenicia. Gúta'yunu lahuë' Jesús ubéajë' bö' xihui' na' yu'u-bi' bi'i nigúlado' queënu. ²⁷ Ní'irö Jesús gudxë'-nu, rnnë':

—Bë' lataj ulu'huölaj zí'alö nupa nácagaca ca zxí'ini xan yu'u, tu' cabí naca dxi'a ugúaru' yöta quégacabi' bi'i na', en chú'unaru' le lógacaba' bó'cu'do'.

²⁸ Bubí'inu didza' nigula na', gúdxinu Jesús:

—Ön, Xan, pero yugu' bó'cu'do' nacuá'aba' zxani ga tágubi', táguba' le bizxaj tu'huóxaj ga na' tágubi'.

²⁹ Ní'irö Jesús gudxë'-nu, rnnë':

—Tu' gunnó' caní, huáca huóaju'. Chiburúaj bö' xihui' na' guyú'u-bi' bi'i nigúlado' quiu'.

³⁰ Cate' budxinu lídxiu, bilé'enu-bi' bi'i nigúlado' queënu na', dëbi' lu da'a, en chinurúaj bö' xihui' na' guyú'u lëbi'.

Jesús ruúnë' tu bönni' nacódzuë', en biti' gaca inné'

³¹ Burúajë' Jesús lataj na' nababa yödzö Tiro, ate' gudödë' gapa dë yödzö Sidón, en yugu' yödzö Decápolis, ate' bidxinë' ra' nísado' lu xiyú Galilea. ³² Bönachi ni' dujuá'gaca tuë' bönni' nacódzuë', en biti' raca inné' ga zoë' Jesús, ate' ta'ta'yu lahuë' Jesús ixóa në'ë lë'. ³³ Jesús bubéajë' lë' tsölá'alö ladjagaca bönachi na', ate' buné'ë xibón në'ë yeru náguië' bönni' na'. Gurú'unë' zxóna'do', en gudanë' lúdxë'ë. ³⁴ Ní'irö buyüë' lúzxibálö, en gunné lúdxë'ë, rnnë':

—Efata.

Didza' hebreo ni rnna lu didza' xidza': Guyalaj.

³⁵ La' böáljatë náguië', en la' buguítjatë lúdxë'ë, en gunnëtë' dxí'ado'.

³⁶ Jesús gunná bé'enë' légaquië' cuntú nu ilé' ca', pero tsca gunná

bé'enë' légaquië', bulu'zëtërë' ca' didza' que læ na' benë'. ³⁷ Bulu'báinë, ta'nnë':

—Tsáhui'do' runë' yúgu'të. Runë' ga tu'yöni nupa gulaca cödzu, en ga tuí'i didza' nupa bití' guca ila'nnë.

Rugahuë' Jesús zíanrö ca choá' gayuá' bönachi

(Mt. 15:32-39)

8 ¹ Yugu' dza na' bulu'dubi bönachi zían ga zoë' Jesús. Tu' cabí dë le ilágugaca, Jesús bulidzë' bönni' usëda queë', ate' bé'lenë' légaquië' didza'. ² Gudxë' légaquië':

—Ruhuechi' ládxa'a bönachi zían ni tu' chinaca tsonna dza nacué'len neda' ni, en bití' dë le ilágugaca. ³ Channö usól-la'a léguequi lídxigaca ta'dunsö ca', huala'cuídi' la' nöza, tu' zá'gaca zi'tu' bál-lagaca.

⁴ Bulu'bi'ë didza' bönni' usëda queë', të' Lë':

—¿Bizxi ugágutsaru' bönachi guizxi yu ni, ga ni naca lataj cá'asö?

⁵ Gunábinë' Jesús légaquië', rnnë':

—¿Bál-laxi yöta xtila dë queé'li'?

Të' Lë':

—Gádxisö.

⁶ Ní'irö Jesús gunná bé'enë' bönachi zían na' ila'bó' lu yu. Gudélë'ë gadxi yöta xtila na', ate' gudxë' Dios: “Xclenu’.” Ní'irö buzuxzjë' léguequi, en bë'ë quégaquië' bönni' usëda queë' para ila'guísië' lógaca bönachi zían na'. ⁷ Guta' ca' quégaquië' tu chópaba' böla cuidí'. Jesús gudxë' Dios: “Xclenu’”, ate' gunná bé'enë' légaquië' ila'guísië' ca' légacaba' lógaca bönachi. ⁸ Gulagu yúgu'të bönachi na', en bulu'huólaj. Ní'irö bulu'tubë' le bizxaj nagá'anagaca, ate' gula'lí idú gadxi ga'böra. ⁹ Bönachi na' gulagu gulaca idú ca choá' gayuá'gaca. Jesús busöl-lë' léguequi lídxigaca, ¹⁰ ate' gurenë' læ'e bárcodo' tsözxón len yugu' bönni' usëda queë', ate' bila'dxinë' lu xiyúgaca bönachi Dalmanuta.

Ta'nábinë' Jesús gunë' tu le gaca bë' nuzxi náquië'

(Mt. 16:1-4; Lc. 12:54-56)

¹¹ Ní'irö bila'dxinë' bönni' yudo' fariseo ga zoë' Jesús, en gula'sí lógaquië' ta'díl-lalenë' Lë' didza'. Gulé'ënnë' ila'zí' bë'ë Jesús. Que læ ni na' gula'nábinë' Lë' gunë' tu le naca bë' za' yehua' yubá. ¹² Gunnëda' ládxe'ë Jesús, rnnë':

—¿Bizx que ta'nábitsö bönachi ni neda' guna' tu le naca bë' za' yehua' yubá? Le nácatë rea' libí'ili', bití' ca' ilé'eli' tu le naca bë' za' yehua' yubá.

¹³ Ní'irö bulá'alënë' légaquië'. Bubenë' læ'e bárcodo', en sa'yéajë' ia'tsölá'a nísado'.

Le tu'sédinë' bönni' yudo' naca ca cúa zi que yöta xtila

(Mt. 16:5-12)

¹⁴ Gulal-la ládxi'gaquië' bönni' usëda queë' Jesús ilu'ë bi ilahuë', ate' tuz yöta xtila dë lë'e bárcodo' na'. ¹⁵ Ní'irö Jesús buzéajni'inë' légaquië', rnnë':

—Buli'yútsöca' queéli'. Guli'gún chi'i cuinli' para cabí sí'ili' le naca ca cúa zi que yöta xtila quégaquië' bönni' yudo' fariseo, en queë' Herodes.

¹⁶ Gula'sí lógaquië' tu'ë didza' bönni' usëda queë' la' légacasë', ta'nnë':

—Gunnë' caní tu' cabí dë yöta xtila gáguru'.

¹⁷ Réquibe'enë' Jesús le ta'nnë', ate' rë' légaquië':

—¿Bizx que ruí'ili' caní didza' tu' cabí dë yöta xtila gáguru'? ¿Naru' cabí réajni'itseli', en biti' réquibe'itseli'? ¿Ni nácatsö zidi icja ládxi'do'oli'? ¹⁸ ¿Zóatsö guió'j loli', en biti' rilé'eli', en zóatsö guídi nágali', en biti' riyónili'? ¿Naru' cabí röjnétseli'? ¹⁹ Cate' ni' buzzuxxja' gayu' yöta xtila, ate' gulahuë' chi-un gáyue' bönni', ¿bál-laxi ga'böra bulili' le bizxaj butúbili'?

Gula'nnë':

—Chinnu.

²⁰ Gunnë' ca' Jesús:

—Cate' ni' buzzuxxja' gadxi yöta xtila, ate' gulagu choá' gayuá' bönachi, ¿bál-laxi ga'böra bulili' le bizxaj butúbili'?

Gula'nnë':

—Gadxi.

²¹ Ní'irö Jesús gudxë' légaquië':

—¿Naru' cabí réajni'itseli' na'a, bë'a didza' que le tu'sédinë' bönni' na'?

Jesús ruúnë' bönni' Betsaida nachul-la lahuë'

²² Cate' Jesús, en bönni' dá'gaquië' Lë' bila'dxinë' yödzö Betsaida, bila'dxín ga zoë' Jesús nupa dujuá'gaquië' queë' tu bönni' nachul-la lahuë'. Ta'tá'yue' lahuë' canë' bönni' na'. ²³ Jesús gudélë'ë në'ë bönni' na' nachul-la lahuë', ate' guché'ë lë' ní'ilö ra' yödzö. Ni' budxíë' zxöna' guió'j lahuë', en guxóa në'ë lë'. Ní'irö gunábinë' lë', rnnë':

—¿Ba rilé'enu' lati'?

²⁴ Buyüë' bönni' na' nachul-la lahuë', rnnë':

—Rilé'egacada' bönachi, nalá'gaca ca yugu' yaga, pero ta'dá bönachi na'.

²⁵ Leyúbölö guxóa në'ë Jesús guió'j lahuë', ate' buyúdë'ë bönni' na' nachul-la lahuë', ate' böácatë dxí'ado' guió'j lahuë'. Na'a rilé'enë' dxí'ado' yúgu'të. ²⁶ Ní'irö Jesús gusól-lë'ë lë' lidxë', rnnë':

—Biti' tsöjdödu' lahui' yödzö, en cuntu nu guío' le bena' nu zoa lu yödzö ni.

Rnnë' Pedro: “Jesús náquië' Cristo”

(Mt. 16:13-20; Lc. 9:18-21)

²⁷ Gudödi na', bulu'zé'ë Jesús, en yugu' bönni' usëda queë' ni', ate' gula'dödë' yugu' yödzödo' nabábagaca Cesarea, ga na' rinná bë'ë Filipo. Tsanni ni' yú'ugaquië' nöza, Jesús rinabi yudxë' yugu' bönni' usëda queë', rnnë':

—¿Nuzxi ta'nná bönachi naca'?

²⁸ Bulu'bi'ë didza', ta'nnë':

—Ta'nná bal-la bönachi nacu' Juan, bönni' buquilë' bönachi nisa. Ta'nná ia'bal-la nacu' Elías, bönni' bë'ë didza' uláz queë' Dios dza ni'te. Ta'nná ia'bal-la nacu' bönni' yúbölö bë'ë didza' uláz queë' Dios dza ni'te.

²⁹ Ní'irö Jesús gunábinë' légaquië', rnnë':

—Nazxi libí'ili', ¿nuzxi rnnali' naca'?

Bubi'ë didza' Pedro, rnnë':

—Li' nacu' Cristo.

³⁰ Ní'irö Jesús gunná bé'enë' légaquië' cuntu nu ulu'siyönnë' Nu náquië'.

Riguíxjö'ë Jesús ca si' ilútië' Lë'

(Mt. 16:21-28; Lc. 9:22-27)

³¹ Ní'irö gusí lahuë' Jesús rusédinë' bönni' dá'gaquië' Lë', rnnë':

—Run bayudxi qui'i saca'a neda', Bönni' Guljë' Bönachi. Bönni' gula tu'zéajni'inë', en yugu' bixúz unná bë', en bönni' yudo' tu'sédinë' ulu'zóë' neda' tsölá'alö. Ilútië' neda', pero cate' gaca tsonna dza ubana'.

³² Yálajsö bë'lenë' légaquië' didza' ni. Ní'irö Pedro guchë'ë Jesús tsölá'alö, en gusí lahuë' ridil-lë' lë' didza'. ³³ Buécjë' Jesús, en buyüë' ia'zica'rë' bönni' usëda queë', ate' buzenë' bach Pedro, rnnë':

—Gucuita ga zoa'. Nacu' ca Satanás, tu' xihui'. Le rizá' ládxu'u biti' za' lu në'ë Dios, pero ca ta'zá' ládxi'gaca bönachi naca.

³⁴ Ní'irö Jesús bulidzë' yugu' bönni' usëda queë', enca' bönachi nacuá' ni', en gudxë' légaquië':

—Channö ré'enë' nu bönni' të'ë neda', ral-la' uzóë' tsölá'alö le ré'ëni quézinë', en gáquië' ca tu bönni' sa'yéajë' söjtë'ë lë'e yaga cruz, ate' ní'irö huáca të'ë neda'. ³⁵ Nu bönni' ru'í'ida' ládxë'ë yöl-la' na'bán queë', unítië' le, pero nu bönni' unítië' yöl-la' na'bán queë' tu' dë'ë neda', o tu' dë'ë didza' dxi'a quia', udéli'në' bönni' ni yöl-la' na'bán queë'. ³⁶ ¿Naru' uzi'tsë' xibé tu bönni' channö utubë' yúgu'të le dë yödzölió ni, pero uniti cuinë'? ³⁷ Biti' bi gaca unödzjë' tu bönni' le huóá'ui cuinë'.

³⁸ Channö zoë' nu bönni' rutuí'inë' quia' neda', en que xtídza'a lógaca

bönachi ni nucá'anagaca Dios, en tun dul-la', lësca' caní neda', Bönni' Guljè' Bönachi, utuí'ida' queë' bönni' na' cate' guídalena' yöl-la' huáca zxön queë' Xuza', ate' dzágagaquië' gubáz lá'ayi neda'.

9 ¹ Jesús gudxè' ca' légaquië', rnnè':
—Le nácatë rea' libí'ili', nacuá' ni nupa biti' ilátigaca cate' ila'lé'erö idinná bè'ë Dios luyú ni, en ilá' lahui yöl-la' huáca zxön queë'.

Ridzá'a ca riná' lahuë' Jesús

(Mt. 17:1-13; Lc. 9:28-36)

² Cate' chigudödi xopa dza, Jesús guché'ë Pedro, en Jacobo, en Juan, ate' légacasë' yöjáquië' tu lu guí'a sibi. Ni' bidzá'a ca riná' lahuë' Jesús lógaquië' yonnè' na'. ³ Guyëpi yösa bení' lari' nácuë' Jesús, ate' guca chiguíchido'os. Zxíla'do'os guca, le cuntú nu ra' lari' yödzölió ni gaca gun chiguíchido'os ca guca lari' na'. ⁴ Bulu'luí'i lógaquië' Elías, en Moisés, tuí'ilenè' Jesús didza'. ⁵ Ní'irö Pedro gudxè' Jesús:

—Bönni' Usedi, bica' ba rë'u zóaru' ni. Gúntsöca'tu' tsonna yu'u lága'do', tu quiu', ia'tú queë' Moisés, en ia'tú queë' Elías.

⁶ Caní gunné' Pedro tu' cabí nózinè' bi na' rnnè', tu' tádxinè' bönni' usëda queë' Jesús na'. ⁷ Ní'irö guró'ö böaj le gulú'u zxul-la légaquië', ate' biyón chi'i nu ruí'i didza' lu böaj na', rna:

—Bönni' ni Zxí'ina'. Nadxí'ida' Lë'. Buli'zé nágali' Lë'.

⁸ La' bulu'yutë' pero cúnturö nu ta'lé'enè'. Tuzë' Jesús zóalenè' légaquië'.

⁹ Tsanni ni' yú'ugaquië' nöza, tu'dínnië' lu guí'a sibi na', Jesús gunná bé'enè' légaquië' cuntú nu ulu'siyönnè' ca', lë na' bila'lé'enè', cate' ubanrë' lu yöl-la' guti Lë', Bönni' Guljè' Bönachi. ¹⁰ Que lë ni na' gula'gú'usë' ícjagaquië' didza' ni bè'ë, ate' la' légacasë' ta'nabi yúdxinè' luzá'agaquië' bizxi sa'yéaj didza' na' bè'ë, gunné' ubanè' lu yöl-la' guti.

¹¹ Gula'nábinè' Jesús, ta'nnè':

—¿Bizx que ta'nnè' bönni' yudo' usedi run bayudxi guídë' Elías zí'alö ca guídë' Cristo?

¹² Bubi'ë didza' Jesús, rnnè':

—Le nácatë guídë' Elías zí'alö, en ucu'ë yúgu'të ca ral-la' gaca. Na'a, ¿bizxi sa'yéaj le nazúaj lu guichi rna run bayudxi qui'i sáquë'ë Bönni' Guljè' Bönachi, ate' cá'asö ulu'cá'ana bönachi Lë'? ¹³ Rea' libí'ili': Chibidë' Elías, ate' gulunè' queë' tsca gulé'ënnè', tsca nazúaj lu guichi lá'ayi ca ral-la' gaca queë'.

Jesús ruúnë'-bi' bi'i bönni' yu'u lëbi' bö' xihui'

(Mt. 17:14-21; Lc. 9:37-43)

¹⁴ Cate' ni' bulu'dxinè' Jesús, en bönni' dzágagaquië' Lë' ga na' nacu'ë ia'zica'rë' bönni' usëda queë' Jesús, bila'lé'enè' nacuá' bönachi zían ni', ate' bönni' yudo' tu'sédinè' ta'díl-lalenè' yugu' bönni' usëda queë' na'

didza'. ¹⁵ Cate' bönachi zían na' bila'lé'e Jesús, bulu'bani, en carelō zágaca ga na' zē'ē, dijódxigaca Lē': "Padiux."

¹⁶ Ní'irō Jesús gunábinē' yugu' bönni' usēda queē' na', rnnē':

—¿Bizxi didza' na' ridíl-lalenli' légaquiē'?

¹⁷ Bubi'ē didza' tu bönni' nútsē'ē ladaj bönachi zían na', rnnē':

—Bönni' Usedi, nachē'a-bi' bi'i bönni'do' quia' ni quiu', yu'u lēbi' bö xihui' le run ga biti' raca innēbi'. ¹⁸ Cate' bö' xihui' na' ru'u lēbi', rurixi rutula lēbi' lu yu, ate' ribía bidxina' zidi' ruá'abi', en rutil-la láya'bi'. Que lē ni na' zeaj ridxítabi'. Gunábigacada'-nē' bönni' usēda quiu' ulu'béajē' bö' xihui' na', pero biti' gula'zéqui'nē'.

¹⁹ Bubi'ē didza' Jesús, rnnē':

—Libi'ili', bönni' cabí ta'yéajlē'ē. ¿Gáca'xte caz ral-la' sóalena' libí'ili'? ¿Gáca'xte caz ral-la' guá' ilena' queéli'? Guli'diguá'-bi' quia' ni.

²⁰ Dujuá'agaquiē'-bi' ga na' zoē' Jesús. Cate' bö' xihui' na' bilé'e Lē', la' buxízitē lēbi'. Gudzó'öbi' lu yu, ate' burixi butula lēbi', ate' bidxía bidxina' zidi' ruá'abi'. ²¹ Ní'irō Jesús gunábinē' xúzibi' bi'i na', rnnē':

—¿Gáca'xi chiguca raca caní queēbi'?

Rnnē' xúzibi' na':

—Ní' nácatēbi' bí'ido' ré'ebi' caní. ²² Zían luzuí rirú'una lēbi' lu guí', en lu nisa para guti lēbi'. Que lē ni na', channō racu' lati', buéchi' ladxi' netu', gácalenu' netu'.

²³ Jesús gudxē' lē':

—Channō huáca tséajlē'u, yúgu'tē huáca channō tséajlē'u Dios.

²⁴ La' bē'tē' zidzaj didza' xúzibi' bi'i na', rnnē':

—iRéajlē'a! iGúcalen neda' para tséajlē'ēra' Lē'!

²⁵ Cate' bilé'enē' Jesús zágaca bönachi zían, tu'quí Lē', buzenē' bach bö' xihui' na', rē' le:

—Li', bö' xihui' runu' ga biti' raca inná, en biti' raca yōni bönachi, rinná bé'eda' li' uruju' lu bi'i ni, en bíti'rō tsu'u lēbi'.

²⁶ Guródxia bö' xihui' na', en burixi butúlada' bi'i na'. Ní'irō burúajtē, en bucá'ana bi'i na' ca bi'i nati cázabi'. Ca' naca, guluí'i didza' bönachi zían ni', ta'nná:

—Chinátibi'.

²⁷ Ní'irō Jesús gudélē'ē ná'abi', en buchisē'-bi', ate' guzuíbi' bi'i na'.

²⁸ Ní'irō guyáziē' Jesús tu yu'u, ate' la' légacasē' gula'nábinē' bönni' usēda queē' Lē', ta'nnē':

—¿Bizx que biti' guca ubéajtu' netu' bö' xihui' na'?

²⁹ Jesús gudxē' légaquiē':

—Biti' gaca ubéajli' cá'asö bö' xihui' caní, pero tuz channō ulídzali'-nē' Dios, en gunli' gubasa.

Jesús riguíxjö'ë leyúbölö ca si' ilútië' Lë'

(Mt. 17:22-23; Lc. 9:43-45)

³⁰ Cate' bulu'zé'ë Jesús, en yugu' bönni' dá'gaquië' Lë' ni', gula'dödë' luyú Galilea. Biti' ré'ënë' Jesús nu inözi ga na' zoë' ³¹ tu' rusédinë' yugu' bönni' usëda queë'. Rë' légaquië':

—Ulu'dödë' neda', Bönni' Guljë' Bönachi, lu ná'agaquië' bönni' ilútië' neda', pero tödi gátia', cate' gaca tsonna dza ubana'.

³² Biti' gula'yéajni'inë' didza' ni rë' légaquië', ate' tu' tádxinë', bití' bi gula'nábinë' Lë'.

Nu naca lo

(Mt. 18:1-5; Lc. 9:46-48)

³³ Ní'irö Jesús, en bönni' dá'gaquië' Lë' bila'dxinë' yödzö Capernaum, ate' tsanni ni' nacu'ë lu yu'u, Jesús gunábinë' légaquië', rnnë':

—¿Bizxi didza' na' gudíl-lalen luzá'ali' cate' ni' yú'uli' nöza?

³⁴ Légaquië' bulu'sayaj rú'ugaquië', tu' gula'díl-lalen luzá'agaquië' didza' la' nöza ni' núzxilögaquië' gáquië' bönni' lo. ³⁵ Ní'irö gurö'ë Jesús, en bulidzë' idxínnutë' bönni' usëda queë'. Rë' légaquië':

—Nu ré'ëni gaca lo ral-la' gaca ca tu bönni' cuídi'sö, enca' ca ni'a ná'ali' yúgu'tëli'.

³⁶ Ní'irö Jesús gudélë'ë-bi' tubi' bí'ido', en buzóë'-bi' gatsaj láhui'lö ga na' nacu'ë. Ni' runidë'-bi', rë' légaquië':

³⁷ —Nu bönni' si' lu në'ë tu bí'ido' caní tu' néquibi' quia', si' lu në'ë ca' neda', ate' nu bönni' si' lu në'ë neda', calëga néda'sö si' lu në'ë, pero si' lu në'ë ca' Xuza', Bönni' na' nasól-lë'ë neda'.

Nu bití' ridá'baga' rë'u, rácalen rë'u

(Mt. 10:42; Lc. 9:49-50)

³⁸ Ní'irö Juan gudxë' Jesús:

—Bönni' Usedi, bilé'etu'-në' tu bönni' rubéajë' yugu' bö' xihui', rugunë' dxin lo'. Gunná bé'etu' lë' bíti'rö gunë' ca', tu' cabí dë'ë rë'u.

³⁹ Ní'irö Jesús gudxë' lë':

—Biti' inná bé'eli'-në', tu' channö zoë' nu bönni' runë' tu yöl-la' huáca le za' yehua' yubá, en rugunë' dxin La' neda', bití' ca' gaca bönni' na' inné' zì'ë quia'. ⁴⁰ Caní naca, nu bití' ridá'baga' rë'u, rácalen nu na' rë'u. ⁴¹ Núti'tës nu gunna queé'li' tu zxíga'do' nisa guí'jali' tu' dá'ali' neda', Cristo, si'i caz nu na' le ral-la' gata' que.

Zoa bönadxi queéru' gunru' ga nu gun dul-la'

(Mt. 18:6-9; Lc. 17:1-2)

⁴² Gunné' ca' Jesús:

—Núti'tès nu gun ga gunbi' dul-la' tubi' bí'ido' caní réajlë'ëbi' neda', gácarö dxi'a ugal-la' nu na' guichi riyëtu yaga yeni, en tsöjchú'una cuini lu nísado'. ⁴³ Channö tu no'o gun ga gunu' dul-la', guchugu le. Dxí'arö gaca quiu' tsöjtsáziu' ga su' ibanu' zoa tuz no'o, calëga zoa chopá no'o, ate' tsöjtsáziu' lu guí' gabila, ga ni' bití' ulu guí' que. ⁴⁴ Lataj ni' bití' ilátiba' buzuga' yú'ugacaba' nupa tsöjcuá' ni', ate' guí' na' bití' ca' ulu. ⁴⁵ Lësca' caní, channö tu ni'u gun ga gunu' dul-la', guchugu le. Gácarö dxi'a quiu', tsöjtsáziu' ga su' ibanu' zoa tuz ni'u, calëga zoa chopá ni'u, ate' tsöjtsáziu' lu guí' gabila, ga ni' bití' ulu guí' que. ⁴⁶ Lataj ni' bití' ilátiba' buzuga' yú'ugacaba' nupa tsöjcuá' ni', ate' guí' na' bití' ca' ulu. ⁴⁷ Lësca' caní, channö tu guió'j lo' gun ga gunu' dul-la', guléaj le. Gácarö dxi'a quiu' tsöjtsáziu' ga rinná' bë'ë Dios zoa tuz guió'j lo', calëga zoa chopá guió'j lo', ate' tsöjtsáziu' lu guí' gabila. ⁴⁸ Lataj ni' bití' ilátiba' buzuga' yú'ugacaba' nupa tsöjcuá' ni', ate' guí' na' bití' ca' ulu.

⁴⁹ 'Ruxi'iru' bëla' zödi', en rugála'ru' le ra' guí', para cabí gaca ditaj. Lë ni rusedi rë'u ca ulu'huöáca dxi'a yúgu'të bönachi. Lësca' caní, ré'ënë' Dios izxí'i zödi' yúgu'të böa' bëdxido' tu'zégui'gaquië'-ba' lu bucugu lá'ayi queë'. ⁵⁰ Dxi'a naca zödi', pero channö initi yöl-la' siná'a que, ¿nacxi úniru' le siná'a? Guli'gaca la' libí'isili' ca zödi' dxi'a, sóali' dxí'ado' tuli' len ia'tuli'.

Rusédinë' Jesús que nu rulá' yöl-la' nutsaga na'

(Mt. 19:1-12; Lc. 16:18)

10 ¹ Buzé'ë Jesús yödzö Capernaum, ate' guyijë' luyú Judea, en gudödë' ia'tsölá'a yegu Jordán saca' ga rilén gubidza. Bulu'dubi leyúbölö bönachi zían ga zoë', ate' leyúbölö busédinë' légaquië' ca run cazë'. ² Ní'irö bila'dxinë' bönni' yudo' fariseo ga zoë' Jesús, ate' té'ënnë' ilunë' ga bi innë' Jesús para gaca ulu'zéguië' Lë' didza'. Gula'nábinë' Lë', ta'nnë':

—¿Dë lataj bönni' nutsaga në'ë usanë'-nu nigula queë'?

³ Bubi'ë didza' Jesús, rnnë':

—¿Bizxi gunná bé'enë' Moisés libí'ili'?

⁴ Gula'nnë':

—Moisés bë'ë lataj nu bönni' uzúajë' lu guichi le rnna rulá'alënë'-nu nigula queë' na', ate' ní'irö usanë'-nu.

⁵ Bubi'ë didza' Jesús, rnnë':

—Gunná bé'enë' Moisés libí'ili' caní tu' naca zidi icja ládxi'do'oli',

⁶ pero cate' gusí lo rata' yödzölió, Dios benë' légaquië' bönni', en nigula.

⁷ Gunné': "Que lë ni na' ucá'anë' bönni' xuz xiné'ë, en tsöjsóalënë'-nu

nigula queë', ⁸ ate' chopë' ni ulu'huöáquië' ca tuz bönachi." Que lë ni na' bíti'rö nácagaquië' chopë' pero tuz chinácagaquië'. ⁹ Que lë ni na' ca', nu naca bönachi bitì' ral-la' ulá'a nupa na' chinutságuië' Dios.

¹⁰ Cate' gula'yázië' yu'u, gula'nabi yúdxinë' bönni' usëda queë' Jesús ca naca didza' na' bë'ë. ¹¹ Jesús gudxë' légaquië':

—Núti'tës bönni' ulá'alenë'-nu nigula queë', en utsaga ná'alenë'-nu nigula yúbölö, runë' dul-la' le riguitsaj xibá que yöl-la' nutsaga na' tu' rusubáguë'ë-nu dul-la' nigula na' guzóalenë'-nu zí'alö. ¹² Lësca' caní channö tu nigula nutsaga ná'lennu bönni' usannu-në', en sí'inu-në' bönni' yúbölö, runnu ca' dul-la' le riguitsaj xibá que yöl-la' nutsaga na'.

Jesús rulidza tsáhuë'ë-bi' yugu' bí'ido'

(Mt. 19:13-15; Lc. 18:15-17)

¹³ Ní'irö bila'dxín bönachi ga zoë' Jesús dujuá'gaquië' bí'ido' quéguequi. Té'ëni ixóa në'ë légacabi', ate' gula'sí lógaquië' bönni' usëda queë' Jesús ta'dil-la dídza'gaquië' nupa na' dujuá'agaca légacabi'.

¹⁴ Cate' bilé'enë' Jesús lë ni, gulénë' légaquië', en gunné':

—Guli'güí'-gácabi' bí'ido' lataj ila'dxinbi' quia'. Biti' uzága'gacali'-bi', tu' gata' quégaca nupa nácagaca ca bí'ido' ni, lataj ga rinná bë'ë Dios.

¹⁵ Le nácaté rea' libí'ili': Nu cabí si' lu në'e le rinná bë'ë Dios ca runbi' tu bí'ido', bitì' ca' tsaza ga ni' rinná bë'ë.

¹⁶ Ní'irö Jesús bunidë'-bi' yugu' bí'ido' na'. Guxóa në'ë légacabi', en bulidza tsáhuë'ë-bi'.

Bönni' cuidi' napë' yöl-la' tsahui'

(Mt. 19:16-30; Lc. 18:18-30)

¹⁷ Cate' bu'ë Jesús nöza, carelö bidë' tu bönni', en buzóa zxibë' lahuë' Jesús, en gunábinë' Lë', rnnë':

—Bönni' Usedi idú dxi'a, ¿nacxi guna' para idéli'da' yöl-la' na'bán idú?

¹⁸ Jesús gudxë' lë':

—¿Bizx que ru'u neda' didza', rnno': "Idú dxi'a"? Cuntu nu bönni' náquië' idú dxi'a. Tuzë' Dios náquië' idú dxi'a. ¹⁹ Chinóz quézinu' yugu' le gunná bë'ë Dios, gunné':

Biti' gunu' dul-la' le riguitsaj xibá que yöl-la' nutsaga na'.

Biti' gútiu' bönachi.

Biti' cuanu'.

Biti' innío' que luzó'o le cabí nácaté.

Biti' ucáchi'lanu'.

Ben bal xuz xinó'o.

²⁰ Bubi'ë didza' bönni' na', rë' Jesús:

—Bönni' Usedi, yúgu'të lë ni run caza' cate' ni' nácatea' bí'ido'.

²¹ Len yöl-la' dxi'i ladxi' queë', Jesús buyúë' lë', rnnë':

—Tu le riyadzaj quiu'. Guyéaj, yöjëti' yúgu'të le dë quiu', en bunödzej quégaca bönachi yechi' lë na' si'u, ate' gata' quiu' yöl-la' tsahui' yehua' yubá. Ní'irö huödu' quia', gacu' ca tu bönni' sa'yéajë' sötjé'ë lë'e yaga cruz, ate' to'o neda'.

²² Cate' biyönnë' didza' ni, buí'innë', ate' söhuójë' risëbi lãdxë'ë tu' dëda' yöl-la' tsahui' queë'.

²³ Ní'irö buyüë' Jesús gásibi'ilë', en gudxë' yugu' bönni' usëda queë':

—Böniga naca ila'yaza nupa ta'lé'e yöl-la' tsahui' ga rinná bë'ë Dios.

²⁴ Bulu'bánninë' bönni' usëda queë' ca naca xtídzë'ë, ate' leyúbölö Jesús gudxë' légaquië':

—Libi'ili', zxí'ina'do', böniga naca ila'yázië' bönni' tu'zxöni lãdxi'gaquië' yöl-la' tsahui' quégaquië' ga rinná bë'ë Dios. ²⁵ Nácarö böniga tsázië' nu bönni' rilé'enë' yöl-la' tsahui' ga rinná bë'ë Dios, ca tódiba' böa' ta'bía-ba' bönachi lu nagui yötsi'.

²⁶ Cate' bila'yönnë' didza' ni, bulu'bánnitëronë' ca'. Ta'nnë' la' légacasë':

—¿Nuzxi caz gaca ulá, channö?

²⁷ Buyüë' Jesús légaquië', rnnë':

—Biti' gaca gun bönachi lë ni, pero huáquië' Dios, tu' rizéqui'në' Dios yúgu'të.

²⁸ Ní'irö Pedro gudxë' Lë':

—Xan, netu' nucá'anatu' yúgu'të, en dá'atu' Li'.

²⁹ Bubi'ë didza' Jesús, rnnë':

—Le nácatë rea' libí'ili', nu bönni' ucá'anë' lidxë', o bóchë'ë, o zanë', o xuzë', o xiné'ë, o nigula queë', o yugu' zxí'inë', o xiyüë', tu' runë' xichina' o tu' runë' libán que didza' dxi'a quia', ³⁰ bönni' ni huazí' queë' ia'tú gayuá'tërö ca' dza ni zóaru' na'a, yugu' lidxë', en yugu' bóchë'ë, en yugu' zanë', en yugu' xiné'ë, en yugu' zxí'inë', en yugu' xiyüë', enca' yugu' le ila'bía lãdxi'gaca bönachi lë', ate' lu yödzölió si' za', gata' yöl-la' na'bán idú queë'. ³¹ Zián nupa nácgaca lo na'a, ilaca cuídi'sö ni', ate' nupa nácgaca cuídi'sö na'a, ilaca lo ni'.

Leyúbölö riguíxjö'ë Jesús ca si' ilútië' Lë'

(Mt. 20:17-19; Lc. 18:31-34)

³² Cate' ni' yú'ugaquië' nöza, ta'benë' sōjáquië' Jerusalén, nanóruë' Jesús lógaquië' bönni' usëda queë'. Nanítiguequinë', en lu yöl-la' rádxisö sōjácálenë' Lë'. Leyúbölö Jesús guché'ë quez idxínnutë' na'. Gusí lahuë' ruí'ilenë' légaquië' didza' ca naca le ral-la' gaca queë'. ³³ Rnnë':

—Rilé'e quézili' ribenru' zéajru' Jerusalén ga ni' zoa nu udödi neda', Bönni' Guljë' Bönachi, lu ná'agaquië' bixúz unná bë', en lu ná'agaquië' bönni' yudo' usedi, ate' chúguië' quia' gátia', en ulu'dödë' neda' lu ná'agaquië' bönni' zi'tu'. ³⁴ Bönni' na' ulu'titjë' neda', en ilúndë'ë neda'

zi'. Ulu'chejë' neda' zxöna'. Ní'irö ilútië' neda', pero cate' gaca tsonna dza ubana' lu yöl-la' guti.

Jacobo en Juan ta'nábinë' Jesús bi gunë' quégaquië'

(Mt. 20:20-28)

³⁵ Ní'irö gula'biguë'ë Jacobo, en Juan, zxí'inë' Zebedeo, lahuë' Jesús, en të' Lë':

—Bönni' Usedi, ré'ënitú' gunu' queëtu' le inábatu'.

³⁶ Jesús gudxë' légaquië':

—¿Bizxi ré'ënili' guna' queéli'?

³⁷ Gulë' Lë':

—Cate' idxín dza cö'u ga inná bë'u, ben ga có'ötu' tutu' cuitu' ibëla, en ia'tutu' cuitu' yögöla.

³⁸ Ní'irö Jesús gudxë' légaquië':

—Biti' nózili' bi rinábali'. ¿Naru' huáca sí'ili' le ral-la' si'a neda', le naca le qui'i saca'a? ¿Naru' huáca idílali' nisa ca idila' neda' nisa, gátia'?

³⁹ Bulu'bi'ë didza', ta'nnë':

—Huácatu'.

Jesús gudxë' légaquië':

—Le nácatë, le qui'i saca'a neda', sí'ili' ca' libí'ili', en ca idila' neda' nisa, idílali' ca' nisa, ⁴⁰ pero biti' dë lu na'a cóa' nu cuía cuita' ibëla, en nu cuía cuita' yögöla. Dios unödzjë' quégaquië' bönni' chinupë'ë quégaquië' yugu' lataj na'.

⁴¹ Cate' bila'yönnë' ia'chíë' bönni' usëda queë' Jesús didza' ni, gula'lenë' Jacobo, en Juan na'. ⁴² Ní'irö Jesús bulidzë' légaquië', rnnë':

—Nöz quézili' ca tun nupa ta'nná be'e yugu' yödzö, tu'zenë' bach bönachi, ate' nupa nácagaca lo ládjagaquië' ta'nná be'e luzé'eguequi.

⁴³ Biti' gaca caní queéli', pero nu gué'ëni gaca zxön ga zóali', ral-la' gun xichinli' ia'zíca'röli', ⁴⁴ ate' núti'tëslöli' nu gué'ëni gaca lo ral-la' gaca ca bönni' huen dxin tsaz queéli' yúgu'tëli'. ⁴⁵ Caní ral-la' gunli' tu' bida' ni neda', Bönni' Guljë' Bönachi, calëga para nu gun xichina', pero para guna' xichíngaca bönachi, en udöda' yöl-la' na'bán quia' le huóá'uida' bönachi zían.

Jesús ruúnë' Bartimeo, bönni' lo chul-la

(Mt. 20:29-34; Lc. 18:35-43)

⁴⁶ Ní'irö bila'dxinë' Jesús, en yugu' bönni' dá'gaquië' Lë' yödzö Jericó. Cate' ni' rurujë' Jesús yödzö ni, dzágagaquië' Lë' yugu' bönni' usëda queë', enca' bönachi zían. Ra' nöza ni' rölë' tu bönni' nachul-la lahuë', lë' Bartimeo, zxí'inë' Timeo. Rinabë' nu bi gúnnasö queë'. ⁴⁷ Cate' biyönnë' Bartimeo ridödë' Jesús, bönni' Nazaret, ni', gusí lahuë' ru'ë zidzaj didza', rnnë':

—iJesús, xzí'ini xi'sóë' David! iBuéchi' ladxi' neda'!

⁴⁸ Nupa ta'dödi ni' gula'dil-la lë' didza'. Të lë':

—Busayaj ru'u.

Ní'irö zídzejrö bulidzë', rnnë':

—iXzí'ini xi'sóë' David! iBuéchi' ladxi' neda'!

⁴⁹ Ní'irö guzóë' dxisö Jesús, ribözë', ate' rë' légaquië':

—Buli'lidzë'.

Bulu'lidzë' bönni' na' nachul-la lahuë'. Të lë':

—iButipa ládzu'u! iGuyaschi! iRulidzë' li'!

⁵⁰ Ní'irö gurú'unë' tsölá'alö lari' naxóa yenë'. La' guyásatë', en bidë' ga na' zoë' Jesús. ⁵¹ Jesús gunábinë' lë', rnnë':

—¿Bizxi ré'ënu' guna' quiu'?

Bubi'ë didza' bönni' na' nachul-la lahuë', rnnë':

—Bönni' Usedi, ré'ënda' gunu' ga huöálaj guiój lahua'.

⁵² Jesús gudxë' lë':

—Böaj lidxu'. Chinuhuöácu' tu' réajlë'u neda'.

La' böáljatë guiój lahuë', ate' sa'yéajlenë' Jesús.

Riyazië' Jesús yödzö Jerusalén

(Mt. 21:1-11; Lc. 19:28-40; Jn. 12 :12-19)

11 ¹ Bila'dxinë' Jesús, en yugu' bönni' dá'gaquië' Lë' gala' ga dë Jerusalén, ga na' nacuá' yödzö Betfagé, en yödzö Betania, en ga na' dë ca' Guí'a Yaga Olivo. Ní'irö Jesús gusól-lë' chopë' bönni' usëda queë', ² en rë' légaquië':

—Guli'tséaj lu yödzödo' dë loru' ni', en cate' tsú'uli' ni', tsöjxáca'li-ba' tuba' búrrodo' nága'ba' ni', en cuntu nu ribíani lëba'. Guli'sedxi-ba', en guli'ché'-ba' quia' ni. ³ Channö nu bi guíë libí'ili' tu' runli' lë ni, guli'guíë nu na': “Xanru' riquinnë'-ba', ate' la' usól-la'të'-ba' quiu'.”

⁴ Ní'irö yöjáquië', en yöjxáca'gaquië'-ba' búrrodo' na', nága'ba' ra' nöza ga nu riyaza lö'a, ate' gula'sedxë'-ba'. ⁵ Nupa nacuá' ni' të légaquië':

—¿Bizxi ni runli'? ¿Bizx que risédxili'-ba' búrrodo' na'?

⁶ Bulu'bi'ë didza' bönni' usëda queë' Jesús, gulé' légaquië' ca na' chigudxi cazë' Jesús légaquië', ate' gulu'ë légaquië' lataj. ⁷ Ní'irö gula'ché'-ba' búrrodo' na' ga na' zoë' Jesús. Gula'xóë' lari' quégaquië' cúdzu'ba', ate' Jesús gudxië'-ba'. ⁸ Zián bönni' nacu'ë ni' gula'chiljë' lari' quégaquië' gapa naca la' nöza. Ia'bal-la bönachi ni' gula'guítsaj zin le bulu'zxóa la' nöza.

⁹ Gula'sí lo nupa nanórugaca lahuë' Jesús, en nupa na' zá'gaca cúdzu'lë' tuí'i zidzaj didza', ta'nnë':

—iYöl-la' ba! iXanru' Dios gun lá'ayë' Bönni' zë'ë ni, nasól-lë'ë Dios Lë'! ¹⁰ iDios gun lá'ayë' Bönni' ni si' inná bë'ë, ca na' gunná bë'ë xuz xtó'oru' David! iYöl-la' ba Dios!

¹¹ Caní guca, bidxinë' Jesús Jerusalén, ate' guyázië' lö'a yudo'. Cate' budxi buyúë' yúgu'të le nacuá' idú gásibi'ilö ni', burúajë' zaca' yödzö Betania tu' chiridzó', ate' dzágagaquië' Lë' yugu' bönni' usëda queë'.

Jesús rulidza zi'ë tu yaga higo

(Mt. 21:18-19)

¹² Cate' za' rení' ia'tú dza, ate' tu'rúajë' Jesús, en yugu' bönni' dá'gaquië' Lë' yödzö Betania, ridunë' Jesús. ¹³ Zi'tu' bilé'enë' tu yaga higo dxía xilagui'. Gubígui'ë ga na' zoa yaga na' channö utsöjxaquië' lati' le ribía. Cate' bidxinë' ni' biti' bi yöjxáquië' le ribía. Xilágui'sö dxía tu' cabí ridxini dza cuía. ¹⁴ Ní'irö Jesús bulidzë' yaga na', rnnë':

—Bíti'rö nu gagu le ribía quiu'.

Yugu' bönni' usëda queë' bila'yönnë' didza' ni.

Jesús rulatjë' lö'a yudo'

(Mt. 21:12-17; Lc. 19:45-48; Jn.2 :13-22)

¹⁵ Cate' bila'dxinë' Jesús, en yugu' bönni' dá'gaquië' Lë', yödzö Jerusalén, guyázië' Jesús lö'a yudo', en gusí lahuë' rubéajë' ní'ilö nupa tuti', en nupa to'o lu lö'a yudo'. Burixë' yugu' blaga quégaca nupa tu'tsá' dumí izá'a, enca' yugu' ga ta'bó' nupa tuti' yugu' gu'dödo'. ¹⁶ Biti' ca' bë'ë lataj nu bi guá', uzóa nöza ga naca lö'a yudo'. ¹⁷ Busédinë' nupa nacuá' ni', rnnë':

—Nazúaj lu guichi lá'ayi, rnna: “Lidxa' si'i le, yu'u ga bönachi idútë yödzölió ulu'lidza Dios.” Libí'ili' chinunli' le ca naca lídxigaca gubán.

¹⁸ Cate' yugu' bixúz unná bë', en yugu' bönni' yudo' usedi bila'yönnë' didza' ni, gula'sí lógaquië' tu'guiljë' nacxi ilútië' Jesús, pero tu' tádxinë' le ilún bönachi, biti' bi gulunë' queë', tu' tu'bani yúgu'të bönachi ca naca le rusédinë' Jesús. ¹⁹ Cate' chiridzó' burúajë' Jesús lu yödzö na'.

Ribidxi yaga higo bulidza zi'ë Jesús

(Mt. 21:20-22)

²⁰ Cate' za' rení' ia'tú dza, gula'dödë' Jesús, en yugu' bönni' dá'gaquië' Lë' ga zoa yaga higo na' bulidza zi'ë Jesús, en bila'lé'enë' le, chinabidxi idú luí. ²¹ Ní'irö yöjnenë' Pedro bi guca, ate' gudxë' Jesús:

—Bönni' Usedi, buyútsöca'. Chinabidxi yaga higo ni bulidza zi'u néaje.

²² Bubi'ë didza' Jesús, rë' légaquië':

—Guli'tseajlë' Dios. ²³ Le nácatë rea' libí'ili', channö nu bönni' guíë' guí'ado' ni: “Gucuíta ni, yöjsóa lu nísado'”, en biti' gaca chopa ládxë'ë bönni' na', pero idú ládxë'ë tseajlë'ë gunë' Dios ca na' rnnë', ca' gaca.

²⁴ Que lë ni na' rea' libí'ili': Yúgu'të le inábali' cate' ulídzali'-në' Dios, guli'tseajlë' chibennë' Dios queéli' lë na' rinábali', ate' gunnë' queéli'.

²⁵ Cate' ni' rulídzali'-në' Dios, channö zoa nu rileli' nu bi ben queéli',

buli'niti lo nu na', para uniti lahuë' ca' libí'ili' Xúzili' na' zoë' yehua' yubá ca naca dul-la' nabága'li'. ²⁶ Channö cabí uniti loli' bönachi, biti' uniti lahuë' Xúzili' zoë' yehua' yubá libí'ili' dul-la' nabága'li'.

Yöl-la' unná bē' dē lu nē'ē Jesús

(Mt. 21:23-27; Lc. 20:1-8)

²⁷ Ní'irö Jesús, en yugu' bönni' dá'gaquiē' Lē' yōjhuó'jgaquiē' Jerusalén. Cate' ni' ridē' Jesús ga naca chila yudo', bila'dxinē' yugu' bixúz unná bē', en yugu' bönni' yudo' usedi, en bönni' gula tu'zéajni'inē', ga zoē'. ²⁸ Gula'nábinē' Jesús, ta'nnē':

—¿Bizxi yöl-la' unná bē' dē lu no'o runu' yugu' lē ni? ¿Nuzxi caz budödi lu no'o yöl-la' unná bē' gunu' caní?

²⁹ Bubi'ē didza' Jesús, rē' légaquiē':

—Neda' ca' inábida' libí'ili' tu didza'. Channö ubí'ili' quia' didza', ní'irö guía' libí'ili' bi yöl-la' unná bē' rúnida' yugu' lē ni. ³⁰ ¿Nuzxi budödi lu nē'ē Juan uquilē' bönachi nisa? ¿Naru' Dios o bönachi? Guli'nnátsöca'.

³¹ Gula'sí lógaquiē' tun xtídza'gaquiē' la' légacasē', ta'nnē':

—Channö innaru' Dios gusól-lē'ē lē', guíē' rē'u: “¿Bizx que biti' guyéajlē'ēli' lē'?” ³² ¿Naru' guíētsaru'-nē': Gula'sól-lē'ē bönni' lē'?

Caní ta'zá' lādxi'gaquiē' tu' tádxinē' le ilún bönachi zían nacuá' ni' tu' téquiguequi yúgu'tē bönachi na' bē'ē didza' Juan na' uláz queē' Dios.

³³ Que lē ni na' gulē' Jesús:

—Biti' nöztu'.

Ní'irö Jesús gudxē' légaquiē':

—Neda' ca' biti' quíxjöi'ida' libí'ili' bi yöl-la' unná bē' dē lu na'a rúnida' yugu' lē ni.

Rucúdzu'ē didza' Jesús ca gaca quégaca

huen dxin biti' nácagaca tsahui'

(Mt. 21:33-46; Lc. 20:9-19)

12 ¹ Ní'irö gusí lahuë' Jesús ruí'ilenē' yugu' bönni' dá'gaquiē' Lē' didza' yugu' le rucúdzu'ē didza', rnnē':

—Guzóē' tu bönni', budé'ē lubá uva zían ga naca lu xiyúē'. Guléquiē' lē'a que, en guchó'önē' tu röga' guió'j ga isíē' xisi uva na'. Budxíē' tu yu'u gupa ga naca xitsá' ga nu uyú xiyúē' na'.

'Ní'irö budödē' xiyúē' na' lu ná'agaquiē' huen dxin, ila'zi'ē gatsaj huéaj le unödzej, ate' guyijē' yödzo' zítu'. ² Cate' bidxín dza ulu'chibē' le ribía, gusól-lē'ē-bi' bi'i huen dxin tsöjxí'ibi' lu ná'agaquiē' huen dxin na' le ral-la' si'ē xanbi' que le gula'bía lubá uva na'. ³ Ní'irö yugu' huen dxin na' gula'guélē'ē-bi' bi'i na', en gulundē'-bi' zi', ate' bulu'sól-lē'ē-bi' cá'asöbi'. ⁴ Ní'irö bönni' xan luyú na' gusól-lē'ē-bi' ia'tubi' bi'i huen dxin queē', ate' bi'i ni bulu'ladxē'-bi' guió'j. Bulu'lé'ē ícjabi'. Gulu'ē dö'

queébi'. ⁵ Ní'irö bönni' xan luyú na' gusól-lë'ë-bi' ca' ia'tubi' bi'i huen dxin queë', ate' bi'i ni gulútië'-bi'. Gusól-lë'ë-bi' ca' zíanröbi', ate' bál-labi' gulúngacadë'-bi' zi', en ia'bál-labi' gulútigaquië'-bi'.

⁶ 'Cúnturö nu nagá'ana queë' xan luyú na'. Nagá'anasibi' zxí'inë', ate' nadxí'ide'enë'-bi'. Ga yöjsetë, gusól-lë'ë-bi' zxí'inë', rnnë': "Ilunë' bal zxí'ina'." ⁷ Ní'irö yugu' bönni' huen dxin na' gula'nné' la' légacasë', ta'nné': "Bi'i ni ral-la' guequi queébi' luyú ni. Guli'dá, gútiru'-bi', ate' guequi queëru' luyú ni." ⁸ Que lë ni na' gula'zönë'-bi', en gulútië'-bi'. Gula'ru'unë'-bi' ní'ilö ga dá'gaca lubá uva na'.

⁹ Ní'irö Jesús gunábinë' bönni' nacu'ë ni', rnnë':

—¿Nacxi gunë' bönni' xan luyú na', channö? Huidë', en gútigaquië' bönni' huen dxin na', ate' udödë' luyú na' lu ná'gaquië' bönni' yúbölö.

¹⁰ '¿Naru' cabí nulábanili' lë na' nazúaj lu guichi lá'ayi? Caní rnna:

Guiöj na' gula'ru'unë' bönni' tu'cu'ë zö'ö, na'a naca guiöj len, squin zö'ö.

¹¹ Xanru' Dios benë' ga naca caní ate' rubániru' ca naca lë ni rilé'eru'.

¹² Ní'irö ta'zóa ta'bö'ë ila'zönë' Jesús tu' téquibe'enë' bucúdzu'ë didza' ca naca quégaquië', pero tádxinë' le ilún bönachi zían nacuá' ni', en que lë ni na' bulu'cá'anë' Lë', söhuöjgaquië'.

Ca naca le ta'guíxaj lázagaca bönachi

(Mt. 22:15-22; Lc. 20:20-26)

¹³ Gudödi lë ni yugu' bönni' yudo' unná bë' na' gula'sól-lë'ë bal-lë' bönni' yudo' fariseo len bönni' dá'gaquië' Herodes ga zoë' Jesús para ilunë' ga bi inné' para gaca ulu'zéguië' Lë' didza'. ¹⁴ Bila'dxinë' bönni' ni ga na' zoë' Jesús, en tē' Lë':

—Bönni' Usedi, nōzitu' ru'u didza' idútë li. Biti' ruí'i lādxi'u bi ta'nnasö bönachi, tu' cabí ruyusu' le tu'luí'isö cuínguequi bönachi, pero rusédinu' ca nácatë le ré'ënë' Dios ilún bönachi. ¿Ruí'i netu' lataj xibá queë' Moisés quíxaj laztu' le tu'quíxjē' uláz queë' César? ¿Naru' uguíxajtu' o biti' quíxajtu'?

¹⁵ Réquibe'enë' Jesús tu'ë didza' lu yöl-la' riguílaj ladxi' quégaquië', ate' rē' légaquië':

—¿Bizx que rubéajli' neda' didza'? Guli'diguá'tsöca' tu dumí ridá para ilé'eda' le.

¹⁶ Diguá'agaquië' le, ate' Jesús gunábinë' légaquië', rnnë':

—¿Nuzxi lahui da' lë'e ni, en nuzxi lë ni?

Bulu'bi'ë didza', ta'nné':

—Queë' César na'.

¹⁷ Ní'irö Jesús gudxë' légaquië', rnnë':

—Buli'nödzej queë' César le nequi queë' César, ate' queë' Dios le nequi queë' Dios.

Bulu'bánnë' ca naca didza' bubi'ë Jesús.

Ca naca que yöl-la' rubán lu yöl-la' guti

(Mt. 22:23-33; Lc. 20:27-40)

¹⁸ Ní'irö bila'dxinë' bal-lë' bönni' yudo' saduceo ga zoë' Jesús. Bönni' ni ta'nnë' biti' ulu'bán nupa chinátigaca. Que lë ni na' gulë' Jesús, ta'nnë':

¹⁹ —Bönni' Usedi, Moisés nuzúajë' queëru' lu guichi channö gátie' tu bönni' biti' zoa bi'i queë', ate' ugá'ananu nigula queë', bi'i böchë'ë bönni' na' ral-la' utsaga ná'alénbi'-nu, en uzóabi' bí'ido' gácabi' bi'i queëbi' böchi'bi'. ²⁰ Gula'cuá'abi' gádxibi' bi'i nácagacabi' böchi'gacabi'. Bi'i huáca na' butsaga ná'alénbi'-nu nigula, ate' gútibi', cuntú nu zoa bí'ido' queëbi'. ²¹ Bi'i buropi na' butsaga ná'alénbi'-nu nigula uzëbi na', ate' gútibi' ca', cuntú nu zoa bí'ido' queëbi'. Lësca' caní guca queëbi' bi'i bunni. ²² Caní guca, bulu'tsaga ná'alénbi'-nu yúgu'tëbi', cuntú nu zoa bí'ido' quégacabi'. Ga yöjsetë, gútinu ca' nigula na'. ²³ Na'a, cate' ulu'bán nupa chinátigaca, ¿núzxilöbi' guéquinu nigula na' queëbi', tu' bulu'tsaga ná'alénbi'-nu igádxitëbi'?

²⁴ Bubi'ë didza' Jesús, rë' légaquië':

—Richíxili' tu' cabí núnbë'ëli' le nazúaj lu guichi lá'ayi, en biti' nózili' ca naca yöl-la' huáca queë' Dios. ²⁵ Cate' ulu'bán nupa chinátigaca, biti' ca' ulu'tsaga ná'agaquië', ate' yugu' bönni' biti' ila'cuá'lenë' nigula, pero ilácagaquië' ca nácagaquië' gubáz lá'ayi queë' Dios, nacu'ë yehua' yubá. ²⁶ Na'a, ca naca quégaca nupa chinátigaca channö ulu'bán, ¿narú' cabí nulábanili' le buzúajë' lu guichi Moisés? Ruí'i didza' ca na' bulidzë' Dios lë' lu yaga yótsi'do' régui. Gudxë' lë': “Neda' naca' Dios queë' Abraham, en Dios queë' Isaac, en Dios queë' Jacob.” Tu' gunné' caní quégaquië', naca bë' nabángaqüië' sal-la' gulátië' zí'alö. ²⁷ Dios náquië' Dios quégaca nupa nabángaca, calëga quégaca nupa nátigaca tsaz. Richíxitërolí'.

Le naca lo le gunná bë'ë Dios

(Mt. 22:34-40)

²⁸ Bidë' ca' tu bönni' yudo' usedi ga zoë' Jesús. Biyönnë' ca na' guluí'ilenë' Jesús didza', en nózinë' dxí'ado' bubi'ë Jesús didza'. Que lë ni na' gunábinë' Jesús, rnnë':

—¿Bízxilö le gunná bë'ë Dios nácaterö lo ca yúgu'të le gunná bë'ë?

²⁹ Bubi'ë didza' Jesús, rë' lë':

—Le gunná bë'ë le nácaterö lo ca yúgu'të naca lë na' rnna: “Guli'yöni bönachi Israel. Xanru' Dios, tuzë' Lë' náquië' Xanru'. ³⁰ Ral-la' idxí'ínu' Xanu' Dios idú ládxi'u, en lu idú icja ládxi'do'o, en lu idú yöl-la' réajni'i quiu', en lu idú yöl-la' huáca quiu'.” Lë ni naca le gunná bë'ë le nácaterö

lo. ³¹ Le gunná bē'ē le naca buropi, lēbisō ca naca. Caní rñna: “Ral-la' idxí'inu' luzó'o ca nadxí'i cuinu'.” Biti' ca' zoa ia'tú le gunná bē'ē le nácarō lo ca chopá ni gunná bē'ē.

³² Ní'irō bōnni' yudo' usedi na' gudxē' Jesús, rññē':

—Dxí'ado' gunnó', Bōnni' Usedi. Le nácatē rñno'. Tuzē' náquiē' Dios, en cúnturō nu zoa naca Dios. ³³ Para idxí'iru'-nē' Dios idú lādxi'ru', en lu idú yōl-la' réajni'i queéru', en lu idú icja lādxi'do'oru', en lu idú yōl-la' huáca queéru', en para idxí'iru' luzá'aru' ca nadxí'i cuinru', nácarō lesaca' ca yúgu'tē böa' bédxido' rútigacaru'-ba' lu bucugu lá'ayi queē' Dios, enca' ca yúgu'tē böa' bédxido' ruzégui'gacaru'-ba' lu bucugu na'.

³⁴ Cate' biyōnnē' Jesús dxí'ado' rubi'ē didza' bōnni' ni, ní'irō gudxē' lē', rññē':

—Ia'láti'sō riyadzaj quiu' gúnbē'u le rinná bē'ē Dios.

Cúnturō nu burugui bi inábini Jesús.

¿Nuzxi xzí'ini náquiē' Cristo?

(Mt. 22:41-46; Lc. 20:41-44)

³⁵ Cate' ni' rusédinē' Jesús bōnachi ga naca chila yudo', rññē':

—¿Bizx que ta'nnē' bōnni' yudo' usedi náquiē' Cristo xzí'ini xi'sóē' David? ³⁶ Lē cazē' David na' bē'ē didza', zóalenē' Dios Bö' Lá'ayi lē', gunné':

Xanru' Dios gudxē' Xana':

“Gurō'ō cuita lē'a ibēla

cate' gunra' ga ulu'zóa xzíbigaca lo'

nupa biti' ta'lé'e Li' dxi'a.”

³⁷ ¿Naru' nácatsē' Cristo xzí'ini xi'sóē' David channō lē cazē' David na' rññē' queē' náquiē' Xanē'?

Bōnachi zían nacué' ni' tu'zé nágagaca Lē' gula'yaza lādxi'gaca didza' ni.

Jesús ruzégui'ē didza' bōnni' yudo' tu'sédinē'

(Mt. 23:1-36; Lc. 11:37-54; 20:45-47)

³⁸ Ni' rusédinē' Jesús yugu' bōnni' dá'gaquiē' Lē', rē' légaquiē':

—Guli'gún chi'i cuinli' quégaquiē' bōnni' yudo' tu'sédinē'. Ta'yaza lādxi'gaquiē' ta'dé' nilō na'lō, nácugaquiē' lari' tunna. Ta'yaza lādxi'gaquiē' ca' tu'lidza tsahui' bōnachi légaquiē' gapa naca lu yé'eyi.

³⁹ Ta'bō'ē yugu' lataj lo lu yu'u ga tu'dubē' tu'sedē' queē' Dios, enca' gapa tu'dubē' tē'aj tahuē'. ⁴⁰ Rugúagaquiē' lídxigacanu nigula uzēbi, en para ulu'lu'isō tsahui' cúngaquiē', xidzé tu'lidzē' Dios. Bōnni' ni, gúnda'rē' Dios légaquiē' xíguia'.

Le bunódzjanu tu nigula uzébido' queë' Dios

(Lc. 21:1-4)

⁴¹ Tsanni ni' rō'ë Jesús chila yudo' ga zoa guí'ina ga ta'gú'u bōnachi dumí que yudó', ruyúë' ca tun bōnachi ta'gú'u dumí lu guí'ina. Dumí zían ta'gu'ë bōnni' dē yōl-la' tsahui' quégaquië'. ⁴² Ní'irō bidxinnu tu nigula yechi' uzébido' ni', ate' gulú'unu chopá dumí lásido', le nazáca'gaca láti'do'os. ⁴³ Ní'irō bulidzë' Jesús yugu' bōnni' usēda queë', en rē' légaquië':

—Le nácatë rea' libí'ili', nigula yechi' uzébido' ni gulú'urōnu ca yúgu'të nupa bi ta'gú'u lu guí'ina que yudo'. ⁴⁴ Yúgu'të bōnni' ni ta'gu'ë que le nagá'anasō quégaquië', pero nigula ni, lu yōl-la' yéchi'do' queënu gulú'unu idútë la's dui tsca le dēsō queënu, le ral-la' gáhuinu.

Riguíxjö'ë Jesús ca si' ulu'quínnejë' yudo'

(Mt. 24:1-2; Lc. 21:5-6)

13 ¹ Cate' burúajë' Jesús chila yudo', tuë' bōnni' usēda queë' gudxë' Lë', rnnë':

—Bōnni' Usedi, buyútsöca' náctiga yugu' yu'u zxōn ni, en náctiga yugu' guiōj lë'e zō'ō quéguequi.

² Bubi'ë didza' Jesús, rē' lë':

—Rilé'enu' yugu' yu'u zxōn ni, pero biti' ca' ugá'ana guiōj lahui luzé'e ni, tu' ulu'quínnej bōnachi léguequi.

Le ilaca bē' cate' si' údxí que yōdzōlió

(Mt. 24:3-28; Lc. 21:7-24; 17:22-24)

³ Ní'irō yōjáquië' Jesús, en yugu' bōnni' dá'gaquië' Lë' lu Guí'a Yaga Olivo, guí'a na' dē ca dódilō ra' yudo'. Cate' chirō'ë Jesús ni', la' légacasë' Pedro, en Jacobo, en Juan, en Andrés, gulé' Lë', ta'nnë':

⁴ —Gudíxjöi'i netu' bátaxi ilaca lë ni. ¿Bizxi gaca bē' chizóa ilaca yúgu'të lë ni?

⁵ Bubi'ë didza' Jesús, rusédinë' légaquië', rnnë':

—Guli'gún chi'i cuinli' para cabí nu si' ye'e libí'ili'. ⁶ Ila'lá' lahuë' zían bōnni' si' lágaquië' ca lea' neda', ila'nnë' nácagaquië' Cristo. Caní ila'zì' yé'enë' bōnachi zían.

⁷ Ní'irō cate' yónili' raca gudil-la nilō ná'alō, biti' gádxili'. Yúgu'të lë ni ral-la' ilaca, pero biti' ridxini dza údxí. ⁸ Tu yōdzō tíl-lalen ia'tú yōdzō, en tu ga nu rinná bē' tsōjtíl-lalen ia'tú ga nu rinná bē'. Zían lataj tōdi budó' xzu', en tsu'u gubín. Ila'tsatsa bōnachi. Yugu' lë ni ilaca le isí lo ila'guí'i ila'zaca' bōnachi dza ni'.

⁹ Ní'irō guli'gún chi'i cuinli', tu' ulu'dödë' libí'ili' lu ná'agaquië' bōnni' yúlalui'. Ila'guinë' libí'ili' gapa tu'dubë' tu'sedë' queë' Dios bōnni' judío. Idxinli' lógaquië' bōnni' ta'nná bé'enë' libí'ili', en lógaquië'

bönni' ta'nná bé'enë' yödzö zi'tu'. Ilunë' caní queé'li' tu' dá'ali' neda', pero gunli' ba nalí quia' neda' ni'. ¹⁰ Zí'alö ca idxín dza údxi, run bayudxi gaca libán que didza' dxi'a quia' lógaca bönachi idútë yödzölió.

¹¹ Cate' ni' ila'ché'ë libí'ili', en ulu'dödë' libí'ili' lu ná'agaquië' bönni' yúlahui', biti' güí'i ládxi'li' bizxi innali'. La' dza ní'isö Dios gunné' queé'li' didza' güí'ili', ate' lë ni innali'. Cate' ni' güí'ili' didza', calëga libí'isili' na' innali', pero Dios Bö' Lá'ayi inné'. ¹² Ulu'dödi bönachi la' böchi'gacasö lu ná'agaquië' bönni' ilútië' légaquië'. Yugu' bönni' nacué'abi' bi'i quégaquië' ulu'dödë' la' zxí'inigaca cazë' ca', ate' zxí'inigaquië' na' ulu'dódibi' la' xuz xiná'agaca cázabi' lu ná'agaquië' bönni' ilútië' légaquië'. ¹³ Yúgu'të bönachi ulu'zóa libí'ili' tsölá'alö tu' dá'ali' neda', pero núlöli' guá' ilenli' lë na' ga idxinrö dza údxi, uláli'.

¹⁴ Nupa tu'laba didza' ni ral-la' ila'yéajni'i. Buzúajë' lu guichi Daniel, bönni' ni' bë'ë didza' uláz queë' Dios, le rnna caní: "Tsaz tu le xihui' le rucá'ana cané ga naca la'ayi." Dza ní'irö ral-la' ila'zxunnaj nupa nacué' luyú Judea, en tsöjaca gapa naca lu guí'ado'. ¹⁵ Nu zoa ícjo'olö dza ni' ral-la' izxúnnajtë, en biti' huötaj xzan yu'u para tsöjzxí' bi' dë que lu yu'u. ¹⁶ Nu zoa la' guixi' ral-la' izxúnnajtë, en biti' huóaj tsöjzxí' lari' rixóa yení. ¹⁷ Bica' bayechi' yugu' nigula dza ni' nuá'agacanu-bi' bí'ido', enca' nigula tu'gádxi'nu-bi' bí'ido'. ¹⁸ Buli'lidzë' Dios inábili'-në' cabí gun bayudxi izxúnnajli' cate' raca beo' ziaga ca'. ¹⁹ Yugu' dza ni' ila'guí'i ila'zaca'rö bönachi ca le guca zí'atëlö cate' si' guta' yödzölió le benë' Dios ga ridxintë na'a dza, ate' dza zá'gaca biti' gaca caní. ²⁰ La'tu' cabí nunë' Dios ga ulu'huóaca nabábasö yugu' dza ni', cuntú nu ulá, pero tu' nadxí'inë' nupa chiguró cazë', chinunë' queë' gunë' ga ulu'huóaca nabábasö yugu' dza ni'.

²¹ Na'a, channö nu guíë libí'ili': "Buli'yútsöca', ni' zoë' Cristo", o inná: "Buli'yútsöca', ni' zoë'", biti' ca' tséajlë'ëli' nu na'. ²² Ila'lá' lahuë' zían bönni' ila'zí' yé'enë' bönachi. Ila'nné' nácagaquië' Cristo, en ila'nné' nácagaquië' bönni' tu'ë didza' uláz queë' Dios. Ulu'luí'inë' le ilaca bë', en ilunë' yugu' yöl-la' huáca zxön. Huala'zí' yé'enë' ca' nupa guró cazë' Dios channö ila'zéqui'në'. ²³ Ní'irö libí'ili', guli'sóa ban ladxi'. Yúgu'të chigudxa' libí'ili' zí'atëlö ca gaca.

Ca huödë' Bönni' Guljë' Bönachi

(Mt. 24:29-35, 42-44; Lc. 21:25-36)

²⁴ Gunné' ca' Jesús:

—Yugu' dza ni', tödi gaca dza na' ila'guí'i ila'zaca' caní bönachi, ichul-la gubidza, en biti' cu'u bení' beo'. ²⁵ Ila'guínnaj böläj lúzxiba, en ila'zxizi le nál-lagaca nalá'gaca lúzxiba na'. ²⁶ Ní'irö ila'lé'eni neda', Bönni' Guljë' Bönachi, za'a lu böaj lúzxiba, napa' yöl-la' huáca zxön, en yöl-la' bení' quia'. ²⁷ Isól-la'gaca'-në' gubáz lá'ayi quia', ate' ulu'tubë'

bönachi guró caza' quia' nacuá' idapa la'a yödzölió, ga naguéla'tè luyú bidxi, ga ridxintè ga naguela' lúzxiba.

²⁸ 'Guli'tséajni'i le rusedi yaga higo ni'. Cate' ta'lén ni'a në'e hué'énido', en rubía xilagui' yulu, nózili' chizóa idxín beo' cusubá.

²⁹ Lësca' caní, cate' ilé'eli' taca lè ni, inózili' chizóa idxín dza údxi na', en chiridzaga lo. ³⁰ Le nácatè rea' libí'ili', yúgu'tè lè ni ilaca zí'atèlò ca ilátigaca nupa nacuá' dza na'. ³¹ Huadödi que lúzxiba, en que luyú ni, pero xtídza'a catu caz tödi que.

³² 'Cate' idxín dza ni' o rëla ni', cuntú nu nözi. Biti' nózguequinè' gubáz lá'ayi nacu'è yehua' yubá, en biti' nözda' neda', Zxí'inè' Dios. Tuzè' Dios Xuz nózinè'. ³³ Que lè ni na', buli'subán ládxi'li'. Guli'sóa sina', en buli'lidzè' Dios tu' cabí nózili' bizxi dza gaca lè ni. ³⁴ Gaca ca raca cate' sa'yéajè' zi'tu' tu bönni'. Cate' chizóa uzé'è lidxè', udödè' lu ná'agaquiè' huen dxin queè' yugu' le dè queè'. Que queégaquiè' gu'è xichíngaquiè', en inná bë'è soa ban ladxi' nu zoa huen chi'i ga nu riyaza. ³⁵ Guli'sóa libí'ili' ban ladxi' tu' cabí nózili' bátaxi huödè' xan yu'u, cate' chiridzò', o gatsaj lahui' yëla, o cate' ribódxiba' böra, o zílado'. ³⁶ Guli'gún caní, para cabí idixáquiè' libí'ili' rásili' channö huödè' tsálido'os. ³⁷ Lè ni rea' libí'ili', rea' ca' yúgu'tè bönachi: Guli'sóa ban ladxi'.

Tun xtídza'gaquiè' bönni' yudo' ila'zönè' Jesús

(Mt. 26:1-5; Lc. 22:1-2; Jn.11 :45-53)

14 ¹ Ia'chopa dza ca' gaca Laní Pascua cate' tu'subanè' bönni' judío ca benè' Dios, bubéajè' xuz xtó'ogaquiè' luyú Egipto. Naca laní cate' tahuè' yöta xtila bití' nazí' cúa zi que. Ta'zóa ta'bö'è yugu' bixúz unná bë', en bönni' yudo' tu'sédinè' ila'zönè' Jesús bagáchi'sö para ilútiè' Lè'. ² Ta'nné':

—Biti' gaca sönru'-nè' dza laní tu' ila'tsatsa bönachi.

Nigula rigú'unu le rilá' zxixi icjè' Jesús

(Mt. 26:6-13; Jn.12 :1-8)

³ Zoè' Jesús yödzö Betania, lu yu'u lidxè' Simón, bönni' güí'inè' huè' nudzu' ruzödi. Tsanni ni' rø'è rahuè' Jesús, guyázanu tu nigula, nuá'anu tu bóga'do' néquini guió'j zaca', yudzu le rilá' zxixi que yøj susén lasi idú, le nazaca' yenni'. Gulá'anu bóga'do' na', en gulú'unu le rilá' zxixi na' icjè' Jesús. ⁴ Gula'lélanè' bal-lè' bönni' nacu'è ni'. Ta'nné' la' légacasè':

—¿Bizx que guca ditaj le zxixi na'? ⁵ La'tu' nu guti' lè na', huazí' que ia'lati' ca lázxjaru' que tu iz para nu quisi le quégaca bönachi yechi'.

Gula'nnédè'è queénu.

⁶ Ní'irö Jesús bë'è didza', rnnè':

—Guli'güi'i-nu lataj. ¿Bizx que rinné zí'ili' queénu? Naca dxi'a le bennu quia'. ⁷ Nacuá'lentica'sö bönachi yechi' libí'ili', en bátati'tës gué'ënili', huáca gunli' dxi'a quégaquië', pero neda' biti' sóatica'sa' ga zóali'. ⁸ Tsca le guzxéqui'nu bennu nigula ni. Cate' gulú'unu le rilá' zxixi ni neda', bupá'anu neda' zí'atëlö ca igácha'a yeru ba. ⁹ Le nácatë rea' libí'ili', gáti'tës ga gaca libán que didza' dxi'a quia' idú yödzölió, soa nu quixjö' ca' lë ni bennu nigula ni quia'. Caní gaca para nu tsöjné lënu.

Rizí' lu në'ë Judas udödë' Jesús

(Mt. 26:14-16; Lc. 22:3-6)

¹⁰ Ní'irö birúajë' Judas Iscariote, bönni' nabábalenë' chínnuë' na' dá'gaquië' Jesús. Guyijë' ga nacu'ë bixúz unná bë' para udödë' Jesús lu ná'agaquië'. ¹¹ Cate' bila'yönnë' xtídzë'ë Judas na', bulu'dzéjanë', ate' gula'zí' lu ná'agaquië' ilu'ë lë' dumí. Ní'irö gusí lahuë' Judas rizóa ribö'ë udödë' Jesús lu ná'agaquië'.

Le rë'aj ráguru' rusubanru' ca gútië' Xanru'

(Mt. 26:17-29; Lc. 22:7-23; Jn. 13 :21-30; 1Co. 11 :23-26)

¹² Naca dza risí lo laní cate' tahuë' yöta xtila biti' nazí'i cúa zi que, dza na' tutië'-ba' bö'cu' zxíla'do' tahuë'-ba' dzö' Laní Pascua na', cate' tu'subanë' ca benë' Dios busölë' bönachi judío luyú Egipto. Ní'irö bönni' usëda queë' Jesús gula'nábinë' Lë', ta'nnë':

—¿Gazxi rë'ënu' tséajtu' tsöjpá'atu' le gáguru' xtsö' que Laní Pascua?

¹³ Ní'irö Jesús gusól-lë'ë chopë' bönni' usëda queë', en rë' légaquië':

—Guli'tséaj lu yödzö. Ni' huadzágali' tu bönni' nu'ë tu rë'ö nisa.

Guli'tséajlenë'. ¹⁴ Ga na' tsázië', guli'guíë' xan yu'u na': “Rnnë' Bönni' Usedi: ¿Gazxi zoa yu'u ga na' gágulengaca'-në' bönni' usëda quia' xtsö' que Laní Pascua?” ¹⁵ Ní'irö uluí'inë' libí'ili' tu yu'u zxön ga naca buropi cuía ga chinabá'a. Buli'pá'a le gáguru' ni'.

¹⁶ Bila'rúajë' bönni' usëda queë' na', en bila'dxinë' lu yödzö, ate' yöjxáca'gaquië' yúgu'të ca na' chigudxë' légaquië' Jesús. Bulu'pé'ë le ilahuë' ni' que Laní Pascua.

¹⁷ Cate' chizá' ral-la, bidxinë' Jesús ni', dzágagaquië' idxínnutë' bönni' usëda queë' Lë'. ¹⁸ Tsanni ni' ró'ögaquië' tahuë', bë'ë didza' Jesús, rnnë':

—Le nácatë rea' libí'ili', zoa nu dzaga libí'ili', nu rágulen neda' tsözxön, nu udödi neda' lu ná'agaca bönachi.

¹⁹ Ní'irö bulu'huí'innë', en gula'sí lógaquië' tu tuë' tē' Lë':

—¿Naru' neda'?

Ia'túë' ca' gunné':

—¿Naru' neda'?

²⁰ Bubi'ë didza' Jesús, rë' légaquië':

—Naca tu nu nutsa' ladaj chínnuli' ni, bönni' na' nuné'ë në'ë tsözxön len na'a lu yó'öna. ²¹ Tseja' ga gátia' neda', Bönni' Guljë' Bönachi, ca na'

nazúaj lu guichi lá'ayi ca gaca quia', pero bica' bayechi' bönni' na' udödë' neda' lu ná'agaquië' bönni' ilútië' neda'. Gácarö dxi'a queë' bönni' na' la'tu' cabí guljë'.

²² Tsanni ni' tahuë', gudélë'ë Jesús yöta xtila. Gudxë' Dios: "Xclenu'." Buzxuzxjë' le, en bë'ë quégaquië', rnnë':

—Guli'gagu. Lë ni naca bëla' rön quia'.

²³ Gudélë'ë ca' tu zxíga'do', en gudxë' Dios: "Xclenu'." Ní'irö bë'ë quégaquië', ate' yúgu'të' gulë'ajë' le. ²⁴ Jesús rë' légaquië':

—Lë ni xichöna' le run tsutsu didza' cubi rucá'ana tsahui', le núnlenë' Dios bönachi. Rön ni ilalaj ni'a quégaca bönachi zián. ²⁵ Le nácatë rea' libí'ili', bíti'rö guí'ja' xisi uva ga idxinrö dza guí'ja' le cubi ga ni' rinná bë'ë Dios.

Jesús rnnë' innë' Pedro biti' núnbë'ë Lë'

(Mt. 26:30-35; Lc. 22:31-34; Jn. 13 :36-38)

²⁶ Gudödi gulúl-lë' yöl-la' ba, bila'rúajë' sőjáquië' Guí'a Yaga Olivo.

²⁷ Ní'irö Jesús gudxë' légaquië', rnnë':

—Yúgu'tëli' gaca chopa ládxi'li', ucá'anali' neda' na'a dzö', tu' nazúaj lu guichi lá'ayi, rnna: "Gutia'-në' uyú bö'cu' zxila', ate' ilásilasiba' bö'cu' zxila' na'." ²⁸ Tödi ubana' lu yöl-la' guti, tseja' luyú Galilea zí'alö ca libí'ili'.

²⁹ Ní'irö Pedro gudxë' Jesús, rnnë':

—Sal-la' yúgu'të' ilaca chopa ládxi'gaquië', en ulu'cá'anë' Li', biti' ca' gaca chopa ládxa'a neda'.

³⁰ Jesús gudxë' lë', rnnë':

—Le nácatë rea' li', la' dzö' nisö, si' códxilöba' böra le buropi luzuí, tsonna luzuí innó' biti' núnbë'u neda'.

³¹ Ní'irö Pedro buzötjë' Dios, rnnë':

—Sal-la' gátilentea' Li' tsözxön, biti' ca' innía' biti' núnbë'a Li'.

Lësca' caní gula'nnë' yúgu'të'.

Jesús rulidzë' Dios la' yëla Getsemaní

(Mt. 26:36-46; Lc. 22:39-46)

³² Ní'irö Jesús, en bönni' dá'gaquië' Lë' bila'dxinë' la' yëla Getsemaní, ate' Jesús gudxë' légaquië', rnnë':

—Guli'cö' ni, tsanni tseja' neda', tsöjlidza'-në' Dios.

³³ Jesús guchë'ë Pedro, en Jacobo, en Juan, ate' gusí lahuë' ridzöbinë', en risëbi ládxë'ë. ³⁴ Gudxë' légaquië', rnnë':

—Huati caza' lu yöl-la' risëbi ladxi'. Guli'cöz ni, en guli'ná' yëla.

³⁵ Ní'irö guzé'ë Jesús ia'láti'do', en busudxín lahuë' lu yu, bulidzë' Dios. Gunábinë' Lë', channö huáca, ucuítë' queë' le ral-la' qui'i sáquë'ë dza na'. ³⁶ Ni' rulidzë' Dios, rnnë':

—Xúza'do', yúgu'të huáca gunu' Li'. Gucuíta lë na' ral-la' qui'i saca'a, pero calëga ca ré'ënda' neda', pero ca ré'ënu' Li', gunu'.

³⁷ Ní'irö bóajë' Jesús ga na' nacu'ë bönni' usëda queë', ate' yöjxáquië' légaquië' tasië'. Gudxë' Pedro:

—Simón, ¿rásitso'? ¿Naru' cabí rubéajtso' yëla lo' tu chí'ido'?

³⁸ Guli'ná' yëla, en buli'lidzë' Dios, inábili'-në' para cabí gata' lataj tu' xihui' idilú'u yöl-la' libí'ili'. Le nácatë bö' naca cázali' zoa caz sina', pero lu yöl-la' bönáchisö queëli' ricuídili'.

³⁹ Ní'irö sa'yéajë' Jesús leyúbölö, rulidzë' Dios, en la' tuz ca gunné'.

⁴⁰ Cate' bóajë' leyúbölö ga na' nacu'ë, yöjxáquië' légaquië' tasië' tu' nadóditë yëla lógaquië'. Biti' nózguequinë' bizxi didza' ulu'bi'ë, le ilé' Lë'. ⁴¹ Cate' bóajë' le bunni luzuí ga na' nacu'ë, rë' légaquië':

—¿Rásitsali'? ¿Ruzi'tsa ládxi'li'? iTsca'ti' gaz! iChibidxín dza! iBuli'yútsöca', Neda', Bönni' Guljë' Bönachi, chinadöda' lu ná'agaca bönachi dul-la'! ⁴² iGuli'chasa, uyéajru'! iBuli'yútsöca', chizé'ë bönni' na' udödë' neda' lu ná'agaca bönachi!

Ta'zönë' Jesús

(Mt. 26:47-56; Lc. 22:47-53; Jn.18 :2-11)

⁴³ Ni' ru'ë Jesús didza' ni, bidxinë' Judas, bönni' nabábalenë' chínnuë' na' dá'gaquië' Jesús, ate' zá'lengaquië' bönni' zían lë', nuá'agaquië' guíë tuchi', en yaga. Yugu' bixúz unná bë', en yugu' bönni' yudo' usedi, en bönni' gula tu'zéajni'inë' nasól-la'gaquië' légaquië'. ⁴⁴ Judas, bönni' na' rudödë' Jesús lu ná'agaquië' chinulú'inë' légaquië' tu le gunë' le gaca bë' nu naca Jesús, gunné':

—Bönni' na' utsaga lahua'-në', Lë' na' Jesús. iGuli'sönë', en guli'ché'ë! iGuli'yútsöquië'!

⁴⁵ Cate' bidxinë' Judas ni', la' gubíga'të' ga na' zoë' Jesús, en gudxë' Lë':

—Bönni' Usedi, Bönni' Usedi.

Ní'irö busudxín lahuë' Jesús. ⁴⁶ Ní'irö gula'zönë' Jesús, en gula'ché'ë Lë' nadzunë'.

⁴⁷ Ní'irö tuë' bönni' ni' dë'ë Jesús guléajë' guíë tuchi', en benë'-bi' huë' bi'i huen dxin queë' bixúz lo. Guchúguië' guídi nágabi'. ⁴⁸ Jesús gudxë' bönachi na', rnnë':

—¿Narúajtsali' nuá'ali' guíë tuchi', en yaga para sönli' neda', runli' ca runli' cate' rizönli'-në' gubán? ⁴⁹ Yugu' dza guzóalena' libí'ili' rusédigacada' bönachi ga naca chila yudo', ate' bití' guzxönli' neda', pero raca caní para gaca le nazúaj lu guichi lá'ayi.

⁵⁰ Ní'irö yúgu'të bönni' usëda queë' Jesús bulu'cá'anë' Le', ta'zxúnnajë'.

Rixúnajbi' tubi' bi'i ra'bán

⁵¹ Zóabi' ca' ni' tubi' bi'i ra'bán sönobi' Jesús, nuxóasö cuinbi' tu lari' blaga'. Yugu' bönni' na' naché'gaquië' Jesús gula'zönë'-bi' ⁵² pero busanbi' lari' na', en xiguídisöbi' buzúnajbi'.

Ridxinë' Jesús lógaquië' bönni' yúlahui' lo

(Mt. 26:57-68; Lc. 22:54-55, 63-71; Jn. 18 :12-14, 19-24)

⁵³ Gula'ché'ë Jesús lahuë' bixúz lo, ate' bulu'dubë' ni' yúgu'të bixúz unná bë', en bönni' gula tu'zéajni'inë', en yugu' bönni' yudo' usedi.

⁵⁴ Pedro yöjnahuë' Jesús zi'tu' zítu'sö, en guyázië' lö'a lidxi bixúz lo na', en guró'ölenë' tsözxón yugu' ni'a në'ë bixúz lo na', rutsë'e cuinë' ra' guí'.

⁵⁵ Yugu' bixúz unná bë' len yúgu'të bönni' yúlahui' lo bulu'guiljë' tu le ulu'subáguië' Jesús para gaca ila'chúguië' queë' gátië' pero biti' bi bulu'dzólinë'. ⁵⁶ Bönni' zían gula'nnë' queë' Jesús le cabí nácatë, pero biti' yöjlózagaca le gula'nnë' queë'. ⁵⁷ Ní'irö gula'zuínë' yugu' bönni' gula'nnë' queë' Jesús le cabí nácatë, ta'nnë':

⁵⁸ —Netu' biyónitu' didza' bë'ë bönni' ni, gunné': “Uquínnaja' yudo' ni, lë ni nequi lu ni'a lu na' bönachi, ate' tsonna dzasö uchisa' ia'tú le cabí nequi lu ni'a lu na' bönachi.”

⁵⁹ Lësca' lë ni, biti' yöjlózagaca xtídza'gaquië'.

⁶⁰ Ní'irö guyasë' bixúz lo na' gatsaj láhui'lö bönachi nacué' ni', en gunábinë' Jesús, rnnë':

—¿Naru' cabí rubi'itso' didza'? ¿Bizxi na' ta'nnë' quiu' bönni' ni?

⁶¹ Jesús, dxisö zoë'. Biti' bi didza' rubi'ë. Gunábinë' Lë' leyúbölö bixúz lo na', rnnë':

—¿Naru' nacu' Li' Cristo, Zxí'inë' Dios Lá'ayi?

⁶² Bubi'ë didza' Jesús, rnnë':

—Naca'. Ilé'eli' neda', Bönni' Guljë' Bönachi, soa' cö'a cuitë' ibëla Dios napa cazë' yöl-la' huáca cate' ni' huöda' lu böaj lúzxiba.

⁶³ Ní'irö bixúz lo na', lu yöl-la' rilé queë' guchözë' lari' nácuë', rnnë':

—¿Núzxirö naquíniru' nu quixjö'? ⁶⁴ ¡Riyón quézili' rucá'anë' Dios cá'asö len didza' ru'ë! ¿Nacxi rusáca'li' queéli'?

Yúgu'të gula'chúguië' queë' gátië'.

⁶⁵ Ní'irö gula'sí lógaquië' bal-lë' tu'chejë' Jesús zxöna'. Bulu'sayjë' lahuë', en gulundë' Lë' zi', ta'nnë':

—Gunnë' yá'atsöca' nuzxi na' bë' Li'.

Yugu' bönni' ni'a në'ë bixúz lo gula'gápë'ë ru'ë Jesús.

Rnnë' Pedro biti' núnbë'ë Jesús

(Mt. 26:69-75; Lc. 22:56-62; Jn. 18 :15-18, 25-29)

⁶⁶ Cate' ni' zoë' Pedro lö'a zzan yu'u, bidxinbi' tubi' bi'i nigula huen dxin queë' bixúz lo na' ga na' zoë'. ⁶⁷ Cate' bilé'ebi' Pedro, rö'ë rutsë'e cuinë' ra' guí', buyubi' lë', rnnabi':

—Do'o ca' li' Jesús, bönni' Nazaret na'.

⁶⁸ Gudá'baguië' Pedro, rnnë':

—Biti' núnbë'a-në', en biti' nözda' bizxi na' rnno'.

Burúajë' Pedro yöjsóë' ga nu riyaza lö'a. Ní'irö guródxiba' böra.

⁶⁹ Buyubi' lë' leyúbölö bi'i nigula huen dxin na', en gusí lobi' rëbi' nupa nacuá' ni':

—Bönni' ni dzáguië' légaquië'.

⁷⁰ Leyúbölö gudá'baguië' Pedro. Ia'lati' gudzé nupa nacuá' ni' të Pedro, ta'nná:

—Le nácatë dzagu' légaquië', tu' nacu' bönni' Galilea. Yöl-la' ruí'isö quiu' didza' naca bë'u, tu' tuz ca ruí'ili' didza'.

⁷¹ Gusí lahuë' Pedro rudxía dö' cuinë', en ruzötjë' Dios, rnnë':

—Biti' ca' núnbë'a-në' bönni' na' ruí'ili' didza' ca naca queë'.

⁷² La' guródxitëba' böra le buropi luzuí. Ní'irö yójnenë' Pedro didza' na' bë'ë Jesús, gudxë' lë': “Zi'alö códxiba' böra le buropi luzuí, tsonna luzuí innó' biti' núnbë'u neda'.” Cate' yójnenë' didza' ni, gusí lahuë' ribódxidë'ë.

Ridxinë' Jesús lahuë' Pilato, bönni' rinná bë'ë

(Mt. 27:1-2, 11-14; Lc. 23:1-5; Jn. 18 :28-38)

15 ¹ Ni' naca zílado', yugu' bixúz unná bë' len bönni' gula tu'zéajni'inë', en yugu' bönni' yudo' usedi, en yúgu'të bönni' yúlahui' lo gulún xtídza'gaquië'. Ní'irö gula'ché'ë Jesús náguë'ë, en bulu'dödë' Lë' lu në'ë Pilato, bönni' rinná bë'ë uláz que yödz Roma.

² Pilato gunábinë' Jesús, rnnë':

—¿Naru' nacu' Li' Bönni' inná bé'enë' bönachi judío?

Bubi'ë didza' Jesús, rnnë':

—Ca nácatë rnno'.

³ Yugu' bixúz unná bë' bulu'zéguië' Jesús didza' le zían. ⁴ Ní'irö Pilato gunábinë' Lë' leyúbölö, rnnë':

—¿Naru' cabí rubi'itso' didza'? Buzétsöca' nagu' cate' xö zían le ta'nnë' quiu'.

⁵ Biti' bi didza' bubí'ë Jesús. Ca' guca, bubáninë' Pilato.

Ta'chúguië' queë' Jesús gátië'

(Mt. 27:15-31; Lc. 23:13-25; Jn. 18 :38-19:16)

⁶ Dë tu le runë' Pilato cate' raca laní na', rusanë' lu ná'agaca bönachi tu bönni' nadzunë' lidxi guíë, núti'tës nu ta'naba. ⁷ Nadzunë' tu bönni' lë' Barrabás lidxi guíë, ate' dzágagaquië' lë' ia'bal-lë' luzé'ë, yugu' bönni' gulútië' bönachi cate' gula'dá'báguië' yúlahui'. ⁸ Cate' bila'dxín bönachi zían ni', gula'sí lógaquië' ta'nabë' lahuë' Pilato gunë' quégaquië' ca run cazë'. ⁹ Bubi'ë didza' Pilato, rnnë':

—¿Ré'ënili' usana'-në' queëli' Bönni' Inná Bé'enë' Bönachi Judío?

¹⁰ Caní gunné' Pilato tu' réquibe'enë' bulu'dödë' yugu' bixúz unná bë' Jesús lu në'ë tu' tu'zxé'enë' Lë'. ¹¹ Yugu' bixúz unná bë' na' gula'gu'ë xilá ládxi'gaca bönachi zían na', para ila'nabë' lahuë' Pilato usanë' lu ná'agaquië' Barrabás. ¹² Ní'irö Pilato gunábinë' légaquië' leyúbölö, rnnë':

—¿Bizxi ré'ënili' guna' queë' bönni' na' ruí'ili' lë', Bönni' Inná Bé'enë' Bönachi Judío?

¹³ Gulu'ë zidzaj didza', ta'nné':

—iBudé'ë lë'e yaga cruz!

¹⁴ Gunábinë' Pilato légaquië', rnnë':

—¿Bizxi caz dö' nu'ë?

Leyúbölö tu'ë zidzaj didza', ta'nné':

—iBudé'ë lë'e yaga cruz!

¹⁵ Tu' gú'unnë' Pilato gunë' ga ila'yaza ládxi'gaca bönachi zían na', busanë' Barrabás lu ná'agaquië'. Ní'irö gunná bé'enë' nu quin Jesús, ate' budödë' Lë' lu ná'agaquië' bönni' ulu'dé'ë Lë' lë'e yaga cruz.

¹⁶ Ní'irö yugu' bönni' röjáquië' gudil-la gula'ché'ë Jesús lö'a yúlahui', ate' bulu'tubë' luzá'agaquië' ni'. ¹⁷ Bulu'gácuë' Jesús tu lari' xiná gul-la, en gulunë' tu bregui' ni'a në'e yötsi', le bulu'dxíë' icjë'. ¹⁸ Ní'irö gula'sí lógaquië' tu'lidzë' Jesús, ta'nné':

—iYöl-la' ba li', rinná bé'enu' bönachi judío!

¹⁹ Gula'guínë' gui icjë', en bulu'chejë' Lë' zxöna'. Bulu'zóa zxíbigaquië' lahuë', en lu yöl-la' rutitaj gulunë' Lë' bal. ²⁰ Cate' budxi bulu'titjë' Lë', bulu'gúë' lari' xiná chul-la na' nácuë' ate' bulu'gácuë' Lë' lari' que cazë'. Ní'irö gula'ché'ë Lë' ní'ilö yúlahui' na' para tsöjda'gaquië' Lë' lë'e yaga cruz.

Tu'dé'ë Jesús lë'e yaga cruz

(Mt. 27:32-44; Lc. 23:26-43; Jn. 19 :17-27)

²¹ Gulunë' ga bi'ë tu bönni' Cirene yaga cruz queë' Jesús, ridódise' ni' suzé'ë la' guixi'. Lë' Simón, xúzgcabi' Alejandro, en Rufo.

²² Gula'ché'ë Jesús lataj na' nazí'i le Gólgota, tu didza' hebreo le rnna lu didza' xidza', Lataj Que Böga' Ícjaru'. ²³ Gulu'ë le guí'jë' Jesús xisi uva

nutsi' nōri silá' que yaga mirra, pero Lē' biti' gu'ē le. ²⁴ Ní'irō bulu'dé'ē Jesús lē'e yaga cruz, ate' gula'guísiē' lari' nácuē', le gula'zí' que queégaquiē' bōnni' na' rōjáquiē' gudil-la. Bulu'béajē' le gaca bē' para ila'nōzinē' bízxilō idela' que queégaquiē'.

²⁵ Naca idú xsila cate' bulu'dé'ē Lē' lē'e yaga cruz. ²⁶ Didza' na' bulu'zōē' lē'e yaga cruz ícjale' Jesús ca naca le tu'quíē' Lē' rna caní: "Bōnni' Rinná Bé'enē' Bōnachi Judío." ²⁷ Bulu'dá'lenē' Jesús tsōzxōn lē'egaca yaga cruz chopē' gubán, tuē' cuita lē'ē ibēla, en ia'túē' cuita lē'ē yōgōla. ²⁸ Caní guca lē na' nazúaj lu guichi lá'ayi, rna: Gubábalenē' bōnni' tuá' dō'.

²⁹ Yugu' bōnni' ta'dödē' ni' tu'lidza zi'ē Jesús, en tu'tá ícjagaquiē', ta'nnē':

—iŌn! ¿Naru' uquínnajtso' yudo' queē' Dios, ate' tsonna dzasō uchísatsu' le? ³⁰ iBusölá cuinu' na'a, en bōtaj lē'e yaga cruz na'!

³¹ Lē'sca' caní yugu' bixúz unná bē', en yugu' bōnni' yudo' usedi tu'titjē' Lē'. Tē' luzá'agaquiē' tuē' ia'túē':

—Bōnachi yúbölō busölē', pero biti' gaca usölá cuinē'.

³² Ta'nnē' ca':

—iŌn! ¿Nácatsu' Cristo, Bōnni' Inná Bé'enē' Bōnachi Israel? iBōtjatsōca' na'a lē'e yaga cruz para ilé'etu', ate' tséajlē'etu' Li'!

Yugu' bōnni' na' dá'gaquiē' tsōzxōn len Lē' lē'egaca yaga cruz bulu'lidza zi'ē ca' Lē'.

Le guca cate' gútiē' Jesús

(Mt. 27:45-56; Lc. 23:44-49; Jn. 19 :28-30)

³³ Cate' bidxín idú huagubidza, guchul-la idútē yōdzōlió. Guca caní ga bidxintē idú ridōdi xihuó. ³⁴ Idú ridōdi xihuó na' bē'ē Jesús zidzaj didza', rnnē':

—Eloi, Eloi, ¿lama sabactani?

Didza' hebreo ni rna lu didza' xidza': Dios quia', Dios quia', ¿bizx que nubéaj ládxu'u neda'?

³⁵ Yugu' bōnni' nacu'ē ni' bila'yōnnē' didza' ni, ate' ta'nnē':

—Buli'zētsōca' nágali'. Elías rulidzē'.

³⁶ Ní'irō guxíti'ē tu bōnni' nútsē'ē ládjagaquiē', en buxúpinē' nupi zi tu le bululu rē'aj nisa. Budé'ē le lahui gui, en bē'ē le xupē' Jesús, rnnē':

—Cōztsōca'ru', uyuru' channō huidē' Elías uzōtjē' Lē'.

³⁷ Guródxi'ē zidzaj Jesús, en la' gútitē'. ³⁸ Birōza' lari' yōdx nala' lu yudo'. Birúaj choplō, gudela' ícjlo, en birúajtē zxánilo. ³⁹ Bōnni' na' rinná bé'enē' bōnni' rōjáquiē' gudil-la zuínē' lahuē' Jesús, en bilé'enē' ca na' guca guródxi'ē Jesús, en la' gútitē', ate' gunné':

—Le nácatē bōnni' ni gúquiē' Zxí'inē' Dios.

⁴⁰ Nacuá'anu ca' ni' nigula, zí'tu'sō tu'yunu. Nútsa'gacanu ládjagacanu María Magdalena, en Salomé, en María, xiná'agacabi' Jacobo cuidi', en

José. ⁴¹ Nigula ni yějácalennu Jesús cate' ni' gudé' luyú Galilea, en gulácalennu Lè', gula'gú'unu le gulahuè'. Nacuá'anu ca' ni' ia'bál-lanu nigula zían gula'zá'lennu Lè' lu yödzo Jerusalén.

Ta'gu'ë Jesús yeru ba

(Mt. 27:57-61; Lc. 23:50-56; Jn.19 :38-42)

⁴² Chizá' ral-la, en naca dza tu'pé'ë, dza si' idxín dza lá'ayi quégaquië' bönni' judío. ⁴³ Que lè ni na' bidè' José, bönni' yödzo Arimatea, bönni' lo ladjagaquië' bönni' yúlalui' lo. Ribözè' ca' dza idinná bè'ë Dios. Idú ladxè'ë guyázië' ga na' zoë' Pilato, en gunábinë' lè' gu'ë lè' lataj u'ë Jesús. ⁴⁴ Bubáninë' Pilato tu' gunné' chigútië' Jesús, ate' bulidzè' bönni' na' rinná bé'enë' bönni' rójáquië' gudil-la para inábinë' lè' channö chinátië' Jesús. ⁴⁵ Cate' biyönnë' ca na' gunné' bönni' na' rinná bé'enë' bönni' rójáquië' gudil-la, bè'ë José lataj u'ë Jesús. ⁴⁶ Ní'irö José na' gú'uë' tu lari' xtila dxí'ado', ate' buzötjè' Jesús lè'e yaga cruz, en buchólinë' Lè' lari' na'. Ní'irö gulu'ë Lè' yeru ba nada' lè'e guí'a guiój. Budé'ë tu guiój blaga zxön ga nu riyaza ba na'. ⁴⁷ María Magdalena, en María, xiné'ë José tu'yunu ga na' ta'gu'ë Jesús.

Rubanë' Jesús lu yöl-la' guti

(Mt. 28:1-10; Lc. 24:1-12; Jn.20 :1-10)

16 ¹ Cate' chinadödi dza lá'ayi quégaca bönachi judío le naca dza gadxi, María Magdalena, en Salomé, en María, xiné'ë Jacobo, ta'zí'ínu yugu' le rilá' zxixi para tsöjlú'ugacanu Jesús. ² Ni' naca zílado' dza risí lo, yějácanu ra' yeru ba queë'. Bila'dxinnu ni' cate' si' gulén gubidza. ³ Gula'nábinu luzá'agacanu:

—¿Nuzxi cúatsö queéru' guiój na' da' ga nu riyaza ba queë'?

⁴ Cate' bila'dxinnu ni', bulu'yunu, en bila'lé'enu chinadúa guiój na', ate' guiój zxön naca. ⁵ Gula'yú'unu yeru ba lè'e guí'a guiój na', ate' ni' bila'lé'enu-bi' tubi' bi'i bönni' ra'bán, nácabi' gubáz lá'ayi queë' Dios. Ró'öbi' tsölá'a ibëla lu yeru ba na', nácubi' lari' tunna chiguíchido'os. Guládxide'enu. ⁶ Ní'irö bi'i na' gúdxibi' légacanu, rnnabi':

—Bíti'rö gádxili'. Ruguílajli' Jesús, Bönni' Nazaret, Bönni' na' gudé'ë lè'e yaga cruz. Chibubanë'. Biti' zoë' ni. Buli'yú ga ni gula'gu'ë Lè'.

⁷ Guli'tséaj na'a, guli'tsöjtíxjöi'i ca' yugu' bönni' usëda queë', enca' Pedro. Guiéli' légaquië': “Tsejè' Jesús luyú Galilea zí'alö ca libí'ili'. Ni' ulé'eli'-në' ca na' chigudxi cazë' libí'ili'.”

⁸ Ní'irö bulu'rúajnu ni', bulu'zxúnnajnu ra' yeru ba na' tu' ta'zxízinu lu yöl-la' radxi ridzöbi quégacanu. Cuntu nu gulënu ca' tu' tádxinu.

Ruluí'i lahuë' Jesús lonu María Magdalena*(Jn. 20:11-18)*

⁹ Cate' bubanë' Jesús zílado' dza na', buluí'i lahuë' zí'alö lonu María Magdalena, nigula na' bubéajë' gadxi bö' xihui' gula'yú'u lënu.

¹⁰ Guyéajnu yöjtíxjöi'inu nupa na' gula'dalen Jesús. Nupa ni ta'sëbi ládxi'gaca, en ta'bödxi yechi'. ¹¹ Cate' bila'yöni didza' ruí'inu, zoë' nabanë' Jesús, ate' bilé'e quézinu Lë', biti' gula'yéajlë' lënu.

Chopë' bönni' usëda queë' Jesús tu'lé'enë' Lë'*(Lc. 24:13-35)*

¹² Gudödi na', nadzá'alö buluí'i lahuë' Jesús lógaquië' chopë' bönni' usëda queë' yú'ugaquië' nöza, sōjáquië' ga naca ladaj guixi'. ¹³ Ní'irö bulu'dxinë', dutíxjöi'iguequinë' ia'zíca'rë', ate' ni xtídza'gaquië' biti' gula'yéajlë'ë.

Le rigu'ë Jesús lu ná'agaquië' bönni' gubáz queë'*(Mt. 28:16-20; Lc. 24:36-49; Jn.20 :19-23)*

¹⁴ Ga yöjsetë, buluí'i lahuë' Jesús lógaquië' idxinéajtë' tsanni ni' ta'bö'ë tahuë', ate' gudil-lë' légaquië' didza' tu' cabí ta'yéajlë'ë Lë', en tu' naca zidi icja ládxi'do'gaquië', tu' cabí gula'yéajlë'ë xtídza'gaca nupa na' bila'lé'e Lë' nubanë'. ¹⁵ Ní'irö gudxë' légaquië', rnnë':

—Guli'tséaj idútë yödzölió tsöjenli' libán que didza' dxi'a lógaca yúgu'të bönachi. ¹⁶ Nu tséajlë' neda', en idila nisa, ulá nu na', pero nu biti' tséajlë', irugu que gati nu na'. ¹⁷ Le ilaca bë' ni ilunë' bönni' ila'yéajlë'ë neda'. Ulu'gunë' dxin La' neda', en ulu'béajë' yugu' bö' xihui' yú'ugaca bönachi, en ilu'ë didza' izá'a. ¹⁸ Channö ila'zönë'-ba' bëla sínia' lu ná'agaquië', o channö ile'jë' le naché' yöl-la' guti, biti' bi gun quégaquië'. Ila'xóa në'ë nupa te'e, ate' ulu'huöácatë.

Ruhuëpë' Jesús yehua' yubá*(Lc. 24:50-53; Hc. 1:6-11)*

¹⁹ Cate' Xanru' budxi bé'lenë' légaquië' didza' ni, buchisë' Dios Lë' yehua' yubá ga ni' gurö'ë cuitë' ibëla Lë'. ²⁰ Bila'rúajë' légaquië', yöjéngaquië' libán yúgu'të yödzö. Gúcalenë' Xanru' légaquië', en benë' ga gulunë' le nácgaca bë' naca idútë li didza' tu'ë. Ca' naca.